

Yëkkuö tsá kit Pablo tö Corinto wakpa a

1 Corintios

Mik Pablo bak kanëblök Éfeso etá ie' tö yëkkuö i' kit Jesús mik erblökwakpa serke Corinto e'pa a. Pablo kèwö ska' tã Corinto dör Grecia ká bua'ie. Pè' bak senuk ikì dōka 650.000. E'pa shuá 400.000 klöulewá kanëblök é. Pablo wák tö tsawe Corinto wakpa a Jesús tté buaë paka'. E' tté tso' kitule Hechos 18.1-17 e' ki.

Alaköl eköl kiè Cloe e' yami wele de Pablo pakök ie' tso' Éfeso ee. E' tö ie' a iyè' tö Jesús mik erblökwakpa tso' Corinto e'pa ñippöke taië ena welepa tso' íyi sulusi wamblök taië, e' kuëkì ie' tö yëkkuö i' kit. Nies ie' tö ikit ilè chaki' ie'pa tö ie' a e' iutoie ie'pa kimoie ena ipattoie.

Kam Corinto wakpa erblö Jesús mik etá ie'pa tö íyi taië dalöieke Skököl skéie, e' dör kabene et. Ì dalöieke ie'pa tö e' a ie'pa tö iyiwak jcheke e' chká katekerakitö iyamipa tã ì dalöiekerakitö e' dalöioie. E' cheke Pablo tö yëkkuö i' ki.

Ñies ì dalöieke ie'pa tö e' wé kos a alakölpa sulusi datse tã wëpa serkerak itã. Erè mik wëpa ñekkëpa erblè' Jesús mik etá ie'pa kè éna iane tö wes ie'pa ké senuk. E' kuëkì Pablo tö ikkaché tö wes wëpa alaköl tã' ena alaköl kè tã' e'pa kawötã senuk.

Kíie tã pè' wele bak ñi dapa'uk Jesús mik erblökwakpa tã, e'pa tö ie'pa wöbla'weke kache tté wa. Ese ché Pablo tö yëkkuö i' ki.

Shke'wè

1 ¹Ye' dör Pablo. Skököl tö ye' klöo'bak iwák er wa Cristo Jesús ttekölpa tsá, e'pa ekölie. S'yami kiè Sóstenes tso' ye' tã. ²A' dör Skököl icha erule serke Corinto, e'pa a sa' tso' yëkkuö i' shtök. A' batse'oule a' batsulewá Cristo Jesús mik e' wa. A' klöo' Skököl tö ie' icha batse'rpaie wépa kos tso' ká wa'ñe tö e' tsatké kié Skökëpa Jesucristo a e'pa tã ñitã. Jesucristo dör ie'pa ena se', e' Kököl. ³Skököl dör S'yé ena Skökëpa Jesucristo, as e'pa er buaë chò ena sene bèrè mù a' a.

Pablo tō wěstela ché Skëköl a

⁴Skëköl er buaë ché tajë a' a Cristo Jesús batamik, e' kuëkij ye' tso' wěstela chök ie' a' këkraë. ⁵A' batsulewā Cristo mik, e' wa ì kōs kiane a' kī wakanewë Skëköl a, e' mène a' a' tajë. Skëköl tō ieri mé a' a' iwā pakoie buaë, ñies iwā jchenowā buaë. ⁶E' wa iwënëwā a' shūa tō mokī a' tō Cristo tté klō'wé buaë. ⁷Es ì kōs kiane a' kī kanebloie Skëköl a, ese métke ie' tō a' a' iWiköl wa. E' wakaneweke a' tō a' tso' Skëkëpa Jesucristo datskene e' panuk, e' dalewa. ⁸Ñies ie' tō a' kīmeraë buaë as a' e' tkōwā darërëë ie' mik dō bata ekkë. Es a' kè kī ì nuí tã' ie' wōā mik Skëkëpa Jesucristo datskene e' kēwō ska'. ⁹Skëköl ttō mokīë e' tō a' klō'bak as a' sër batsulewā ie' alà Jesucristo dör Skëkëpa e' mik.

Jesús mik erblökwakpa ñi blabatsélor

¹⁰A yamipa, ye' tō a' a' ichè Skëkëpa Jesucristo ttō wa tō a' kōs erbikó ñikkëë. Kè a' ñi blabatsök. A' senú buaë ñita. A' kabikeitsó ñikkëë wës wák eköl è es. ¹¹A yamipa, tayë kiè Cloe, e' yamipa wëlepa tō ibiyó ché ye' a' tō a' tso' ñippök ttè kī. E' kuëkij ye' tso' a' a' ichök es. ¹²Ie'pa tō ye' a' iché tō a' kōs ñippöke ñita i' es: A' wëlepa tō icheke: “Ye' dör Pablo klé.” Wëlepa skà tō icheke: “Ye' dör Apolo klé.” Iëkölpa tō icheke: “Ye' dör Cefas^a klé.” A' skà tō icheke: “Ye' dör Cristo klé.” ¹³¿Ima a' ibikeitsè tō Cristo tso' blabutsule? Au, kè idör es. ¿Ye' kōtewā krus mik a' skéie? Au. ¿A' wösune ye' ttō wa? Au. ¹⁴Wěstela chekeyö Skëköl a' tō ye' kè wā a' wösune tajë. Wëpa kiè Crispo ena Gayo, e'pa è wösuk ye' tō. ¹⁵Kè yi a' iyënuk tō ye' tō a' wösuk ye' ttō wa. ¹⁶Ye' éna ianewā i' tã tō ñies ye' tō wëm kiè Estéfanos e' wösuk ena ie' yamipa ekkā. Kè ye' éna iane tō yi skà wösuk ye' tō. ¹⁷Cristo kè wā ye' patkëne s'wöskuök, ie' tō ye' patké ie' tté buaë pakök. Ye' kè tō ttè e' paketa' ttè iskië wa wës s'yöule tajë esepa kapakò es. Ye' tō ipakeke ttè wöshakla wa as Cristo kōtewā krus mik e' tté diché kè chōwa.

Skëköl diché tajë ena ie' siwé iskië, e' wà dör Cristo

¹⁸Wépa weirdaë aishkuö tã, esepa a' Cristo kōtewā krus mik, e' tté dör alīpa ttèie. Erë se' tsatkërke, esepa a' Skëköl diché tajë, e' tté idir. ¹⁹E' dör wës itso' kitule Skëköl yëkkuö kī es, e' tō ichè:

“Skëköl tō ichè: Wépa wā siwā' jcher iskië,
esepa meraatyö wës kè wā ì jcher es.
Wépa kabikeitsò tajë,
esepa éna ká chōwerawayö.”^b

Es Skëköl yëkkuö tō ichè.

^a 1.12 Cefas: E' è kiè ñies Pedro. ^b 1.19 Isaías 29.14

²⁰Es idir e' kuekì s'ditsö wà siwà' jcher iskië, ¿wes esepa de? S'wöbla'uk ttè dalöiëno wa wakpa, ¿wes esepa de? Wépa a s'ditsö iyi tté wà pakar ñi a buaë ¿wes esepa de? Skëköl a ta siwà' iskië jcher s'ditsö wà, e' kè wà ta', e' dör wes alipa ttè es. ²¹Ttè e' wà dör i' es: Skëköl wà iyi jcher iskië, e' kuekì ie' kè wà imeneat tö se' tsatkèr i jcher s'ditsö wà iskië ese wa. E' skéie ie' tö ime'at tò wépa erblé Cristo mik itté pakarke e' wa, esepa è tsatkërdaë eré ittser alipa ttèie.

²²Ì kè or yi a ese kiane suè judiowak kì ttè klö'woie. Griegowak tö siwà' iskië ese yuleke taië. ²³Erë Cristo kötëwà krus mik, e' tté pakeke sa' tö. Ttè e' sulune judiowak yöki. Pè' kè dör judiowak, esepa a ta e' dör alipa ttè. ²⁴Erë wépa kos klö'bak Skëköl tö iwák a, judiowak ö pè' kè dör judiowak, esepa a Cristo dör Skëköl diché taië ena ie' siwé iskië e'. ²⁵Ì wé ie' tö e' wër wes i wè aliwakpa tö es. Ñermata ie' wà siwà' jcher iskië tkòka sulitane tsata. Iwër wësua tö ie' kè diché ta', ñermata ie' diché ta' taië tkòka sulitane tsata.

²⁶A yamipa, mik Skëköl tö a' klö'bak, età ¿wes a' dör? E' anú a' éna. Ká i' wakpa a ta a' kibiiepa kè wà siwà' iskië jcher. A' kibiiepa kè ttò dalöiërta'. A' kibiiepa kè dör kékëpa taië ese ditséwö. ²⁷Erë wépa cheke ká i' wakpa tö tö kè iwà i jcher, esepa shukit Skëköl tö wöbla wa, wépa wà siwà' jcher iskië, esepa jaëwoie. Wépa kè dör kékëpa taië ká i' wakpa a, esepa shukit ie' tö wöbla wa, wépa dör kékëpa taië, esepa jaëwoie. ²⁸Wépa watëulettsa, wépa bikeitseke ká i' wakpa tö tö kè idör iie bua', wépa kè dör i, esepa shukit ie' tö, wépa dalöiërta' taië ká i' kì, esepa wöowaie diöshet. ²⁹Es kè yi a e' ttsënukkà Skëköl wörki. ³⁰Erë Skëköl wák tö a' bätswà Cristo Jesús mik. Cristo batamik ie' tö se' ké siwà' mokì jchenukwà iskië. Ñies Cristo batamik ie' tö se' klö'wé wes pè' buaë yësyesë es, ñies se' de ie' wák ichaie batse'r yënetsa sene sulu ulà a. ³¹E' kuekì s'kawötà senuk wes Skëköl yëkkuö tö ichè es, e' tö ichè: “Yi e' ttsakkà as ese e' ttsòka i wé Skëköl tö ese wa.”^c

Cristo kötëwà wötëulewà krus mik, e' tté paké Pablo tö

2 ¹A yamipa, mik ye' dè' kewe Skëköl tté buaë pakök a' a, età kè ye' wà iwà pakane siwà' iskië ese wa wes a' wakpa yöule taië esepa tö s'wöbla'wëke es. ²Mik ye' bak a' shua, età ye' kè kì i bär tté kianeia. Ye' ibikeitsétke Jesucristo kötëwà wötëulewà krus mik e' tté è pakök. ³Mik ye' dè'bitù a' ska', età ye' ttsërke alabëbë kè diché ta' taië, ye' suarke taië painuke taië. ⁴Ye' tö Skëköl tté buaë e' paké a' a, erë kè ye' wà ipakane siwà' iskië s'ditsö a ese wa a' dakiñoie. E' skéie i pakéyö a' a, e' wà kkaché a' a Skëköl Wiköl tö idiché wa tö mokìie idir. ⁵Skëköl tö iwé es as a' kè erblò siwà' iskië ese mik, e' skéie as a' erblò ie' diché mik.

^c 1.31 Jeremías 9.24

Se' wà Skèkòl siwé jcher iWikòl wa

⁶Erè wépa tkèulewátke darèrè Cristo mik, esepa je' éna iane tò ttè pakeke sa' tò, e' dör siwà' iskiè chòkle. Erè e' kè dör s'ditsò ena iwòkirpa siwà' ese; esepa diché ərkwatke. ⁷Siwà' pakeke sa' tò, e' dör Skèkòl siwà' bak blèulewà s'ditsò yòki e'. Ká iaiaè kām ká i' yör, e' yòki ie' tò ibikeitsbak tò sene michoè olo tã' taiè, e' meraèitò se' a ie' siwà' wa. ⁸Siwà' e' kè ane s'ditsò wòkirpa éna. Ie'pa éna ianúpa, e'ma ie'pa kè wà Skèképa Jesús olo tã' taiè e' kòtewà. ⁹Erè e' dör wës itso' kitule Skèkòl yèkkuò kī es, e' tò ichè:

“Ì buaè kè suule yi wà,

ì buaè kè ttsèule yi wà,

ì buaè kè bikeitsule yi wà,

ese tso' Skèkòl wà mè wépa éna ie' dalèr esepa a.”^d

¹⁰Erè e' kòs wà kkachéitò se' a iWikòl wa. Iwikòl tò íyi ulitane shuyulekettsa sekka dò Skèkòl erbikò iskiè eseè.

¹¹Se' wikòl tso' se' a, e' è wà ijcher ì tso' se' er a. Es ñies Skèkòl Wikòl è wà ijcher ì tso' ie' er a. ¹²Ie' tò iWikòl mé se' a, e' kuekī kè se' kabikeitsòia wës s'ditsò kabikeitsò es. Ie' tò iWikòl mé se' a as ì buaè kòs méitò se' a er bua' wa e' wà ar se' éna. ¹³E' kuekī kè sa' tò s'wòbla'wekū' ká i' a siwà' tso' ese wa. S'wòbla'weke sa' tò ttè kkaché Skèkòl Wikòl tò sa' a e' wa. Es sa' tò Skèkòl Wikòl íyi e' wà pakeke ttè méitò sa' a ese wa.

¹⁴Wépa kè a Skèkòl Wikòl ku', esepa a ie' íyi e' dör alipa íyi, e' kuekī ie'pa kè kī ikiane. Ñies ie'pa kè éna iwà ar, ttè e' wà arke se' éna Skèkòl Wikòl è wa e' kuekī. ¹⁵Erè wépa a Skèkòl Wikòl tso', esepa éna ie' íyi ulitane wà armi buaè. Erè ì weke ie' tò ie'pa a e' kè wà anuk yi éna. ¹⁶E' dör wës itso' kitule Skèkòl yèkkuò kī es, e' tò ichè: “Skèkòl erbikò e' kè jcher yi wà. Kè yi a ie' pautuk.”^e Erè se' èltèpa wà Cristo erbikè tso'.

Se' kòs dör Skèkòl kanè mésopa

3 ¹A yamipa, mik ye' bak a' shuà, età ye' kè a kapakar a' tã wës s'wèttseke Skèkòl Wikòl tò esepa tã kapakè es. E' skéie ye' kawòta kapakòk a' tã wës ye' kunúpa kapakòk t'sto'ia s'wák dër sulu dikia ö ala' tsitsirla kè yöule buaè Cristo ttè wa esepa tã kapakè es. ²Ttè wa ye' tò a' wòbla' e' dör tottola wës tsu'diò mè ala'rla a es, kām a' a chké darèrè katar e' kuekī. IErè ikkè tã kām a' a chké darèrèè katar, ³a' serkeia wës s'wák dër sulu kī ikiane es e' kuekī! A' ñippòke, a' ukyërke ñi kī taiè, e' wà kiane chè tò a' serià wës s'wák dër sulu kī ikiane es, wës pè' kè a Wikòl Batse'r ku' es. ⁴A' welepa tò icheke: “ye' dör Pablo klé.” A' welepa skà tò icheke: “ye' dör Apolo klé.” A' ttòkeia es, e' wa iwènewà tò a' dör wës pè' kè a Wikòl Batse'r ku' es.

^d 2.9 Isaiás 64.4 ^e 2.16 Isaiás 40.13

⁵Età ichò ye' a tò ¿Apolo dör yi? ¿Pablo dör yi? Sa' dör Skèköl kanè mèsopa è. Sa' tò Jesús tté buaè paka' a' a, e' batamik a' de erblök Jesús mik. Kanè me' ie' tò sa' böl a kuà'kì kuà'kì, e' wakanewé sa' tò. ⁶Jesús tté buaè e' tsá tkéyò a' er a, wés íyi kuatkè es. Apolo tò ikkò'né as italar, erè Skèköl wák tò iwà tala'weke. ⁷Yi tò íyi kuatkeke, ñies yi tò ikkò'neke, esepa kè dör ì. Skèköl tò iwà tala'weke, e' dör ibua'ie. ⁸Yi tò íyi kuatkeke, ñies yi tò ikkò'neke, esepa dör ñies ème ie' a. Ie' tò iské meraè ie'pa a eköl eköl wés iwakanewekerakitò es. ⁹A' dör wés ie' tè es, e' a sa' böl kanèblöke ie' a. Ñies a' dör wés u yörke ie' a es. ¹⁰⁻¹¹Ie' er buaè ché ye' a, e' wa ime'itò ye' a ichkí tkökwa wés u yuökwa bua'buwa es. E' ukuökì tã u yuökwa skà de ikì yuökmi. U yörke Skèköl a e' chkì tkènewatke e' dör eköl è, e' dör Jesucristo. Kè yi a ichkì kuà'kì tkènuwane. E' kuèkì se' ulitane eköl eköl kawõtã e' kkò'nuk buaè tò wés iwà kì yuekemisò. ¹²Se' tò iwà yuèmi orochka wa, inukölchka wa ena ák bua'buwa wa ö iwà yuèmisò kaltak wa, kãkò wa ena kuaköl wa. ¹³Mik Jesucristo datskene, etã iwërdaè tò is iwà yuésò. E' kèwò ska' tã se' kanè ma'ordaè bö' wa isuöje tò is idir. ¹⁴U chkì tulunewa, e' kì se' tò iwà yuè, e' tã e' kè ñanewa bö' a tã esepa a iské merdaè. ¹⁵Erè ì yuésò e' ñanewa, e' tã kanè e' weirdawa. Erè esepa tsatkërdaè bö' yökì, erè kè ì atè ie'pa ulã a wés s'tkòshkar u ñarkewa yökì es.

¹⁶¿A' kè wã ijcher tò a' wákpa dör Skèköl wé, ie' Wiköl serke a' shua e' kuèkì? ¹⁷Ie' wé dör batse'r, e' dör a' wákpa. E' kuèkì e' olo'yéwa yi isie tò, e' tã ese olo'yerawã ie' tò.

¹⁸Kè a' e' kítò'ukia. A' welepa e' bikeitsò tò a' wã siwa' iskiè jcher wés s'ditsò tò ibikeitseke es, e' tã esepa kawõtã e' ökwa alije as siwa' mokì jcherwã iwã. ¹⁹Ì dör siwa' iskiè s'ditsò a, ese dör alipa tté Skèköl a. E' dör wés ie' yèkkuò tò ichè es: “Wépa wã siwa' iskiè jcher taiè, esepa klò'wèrawã Skèköl tò iwákpa erbikò s'dakiñoie e' wa wés iyiwak klò'wèwasò sho' wa es.” ²⁰Ñies ichéitò i' es: “Skèköl wã ijcher buaè tò ì tso' ká i' a, ese siwé jchermi s'wã taiè, e' kè dör iie bua'!” ²¹⁻²³Erè a' dör Cristo icha ena Cristo dör Skèköl icha. E' wã kiane chè tò íyi ulitane mé Skèköl tò a' a' a' kimoie. Ye' ena Apolo ena Pedro, e'pa tso' a' kimuk. E' kíie tã ì kos tköke i'ñe tã, ñies aishkuò tã, s'ser ena s'duòwa, ekkè kos tso' a' kimuk. E' kuèkì kè a' kàne s'ditsò wele kkeökka taiè tò e' dör ibua'ie as s'mi' ikléie.

Jesucristo ttekölpa tsá, e'pa kanè

4 ¹Sa' bikeitsò tò sa' dör Cristo kanè mèsopa. Skèköl tté bak blèulewã e' wã pakè wërke sa' wökì wés íyi kuèblu es. ²Íyi kuèblu kawõtã iwakanéuk yèsyèsè wés iwökir tò iuk patké es. ³Es idir, e' kuèkì ima a' tò ö yile skà tò is ye' kanèblöke Cristo a e' bikeitseke, e' kè kì ye' tkine. E' kíie tã ima ye' wák tò ye' kanè bikeitseke, e' kè kì ye' tkine. ⁴Ye' er

kè wà ye' kkatène, erè kè e' wa yö ichepa tò kè ì sulu kù' ye' kì. Skèkèpa Jesucristo tò ye' shùleraè, ìma e' tò ye' bikeitseke, e' è kì ye' tkirke.

⁵Mik ie' dene età sulitane shùleraèitò. Ì kòs tso' blèulewà se' er a, ñies ì dalèrmik se' serke, ese kòs kkacheraèitò wòshak sulitane wòrkì. E' kèwò ska' tà se' kòs kaneblòke buaè ie' a, e'pa kikerakà ie' tò. E' kuekì kè s'kkatar, kàm s'shulir kèwò dòka e' yöki.

⁶A yamipa, ye' tò ye' wák ena Apolo ché a' a' kimoie as e' wa a' tò iwà saù tò kè a' kàne ì tso' kitule Skèkòl yèkkuò kì chétkeyò ñe' dalòseukwà. Kè a' kàne e' ttsòkà taiè sa' ekòl wa ena sa' èkòl wòokwa diòshet. ⁷¿Wes a' tò ichèmi tò a' dör s'malepa tsata? Ì kòs tso' a' wà, ì buaè eri ta' a' wà, wes a' kabikeitsò, e' kòs me' Skèkòl tò a' a. ¿Iók a' e' ttsòkà taiè tò wèsua íyi kòs e' dè'bitù a' wákpa wà, a' wákpa er wa?

⁸Wèsua a' ibikeitseke tò Skèkòl siwà' jcher taiè a' wà, e' dör wè, kè ì kì kianeia' a' kì. A' e' ttsò tò a' s'wèttssémitke blu'paie, erè kàm sa' dòka ekkè. Mokì a' mú s'wèttssémitke blu'paie, e'ma sa' detke a' tà ñita' s'wèttssuk.

⁹Erè ye' a' tà, wèsua sa' dör Jesús ttekòlpa tsá e'pa méat Skèkòl tò s'ditsò malepa bataie. Ye' ittse' tò ká ulitane wakpa ñies Skèkòl biyòchòkwakpa ulitane e'pa tso' sa' weirke e' weblòk. Sa' dör wes s'bolòkpa tò s'klò'wéwà tsèmi sulitane wòrkì ttèwà es. ¹⁰Cristo tté kuekì sa' wèr alíie, erè a' e' bikeitsò tò a' wà siwà' iskiè jcher buaè a' batsulewà Cristo mik e' kuekì. Iyèrke tò sa' kè diché ta', erè a' diché ta' taiè. A' dalöièrta' taiè, erè sa' kè dalöièrta'. ¹¹Dò ikkè ta' sa' tekeia' bli tò ersir tò; kè sa' datsi' ta' buaè; pè' tò sa' we'ikeke siarè; sa' wákpa kè wà u ta' senoiè; ¹²sa' kaneblòke darèrèè sa' wák ulà wa dò sa' shtrinewà da'a ekkè. Mik pè' alibchòke sa' kì, età e'pa a' sa' er buaè chòke. Mik ie'pa tò sa' we'ikeke, età e' dalè'ttseke sa' tò er bua' wa. ¹³Mik pè' tò sa' cheke suluè, età e' iutekene sa' tò ttè bua' wa. Dò ikkè ta' ká i' wakpa wa sulu sa' wèr. Ie'pa a' sa' dör wes ushña uyanettsà ur'kì es.

¹⁴Ye' kè wà ttè i' kite' a' a' jaèwoie, é ye' tso' a' pattòk wes iyé éna ila'r dalèr ese pattèitò es. ¹⁵Cristo Jesús tté buaè paka' ye' tò a' a' kewe, e' wa a' bàtsewà ie' mik. E' kuekì mokì ye' dör wes a' yé es. A' mú wà s'wòbla'ukwakpa Cristo tté wa tso' dòka 10.000, erè ye' ekòl è dör wes a' yé es. ¹⁶E' kuekì ye' tò a' pattè tò a' senú wes ye' serke es. ¹⁷E' kuekì ye' tò Timoteo patkèmi a' ska'. Ie' dör wes ye' wák alà es Skèkèpa wa. Ie' dör ye' ttòkata yèsyèsè dalèr taiè ye' éna. Wes ye' dör Cristo Jesús mik erblòkwak e' ser, e' ttè wa ye' tò ie' icha kòs tso' erule erule ká wa'ñe, e'pa wòbla'weke. Ttè e' ska' Timoteo tò a' er erane.

¹⁸A' wèlepa e' ttsékà taiè tò ibikeitseke tò ye' kè dòpa a' ska'. ¹⁹Erè Skèkèpa kì ikiane, e' tà ye' mi'ke a' pakòk bet. Mik ye' de età ye' tò isuèraè tò a' wépa e' ttsékà taiè, esepa wà Skèkòl diché ta' ö ie'pa kaberke è. ²⁰Ì blúie Skèkòl tso' e' wà wènewà idiché taiè e' kì, kè dör ttè è wa. ²¹¿Ì kiane a' kì? ¿A' kì ikiane tò ye' dò kèsik wa a' uñuk? ö ¿a' kì ikiane tò ye' dò a' ska' er bua' wa, a' dalèritsè wa?

Sene sulu watöttsaşö

5 ¹Ye! itté ttsé tö a' shuā wēm tso' eköl e' trērke suluë tkòkà pè' kè tò Skèköl dalöiè, esepa tsata. Ie' wā iyé alaköl tso'. ²Ì sulu e' tkòke a' shuā, erè e' wa a' e' ttsòkekaiā taijè. E' skéie ¿wes e' kè wā a' jaène? ¿Wes e' kè wā a' eriane? Warma wēm ñe' uya'ttsabak a' tö a' shuā. ³⁻⁴Eré ye' wák kè ku' a' ta, erè ye' ttòke wes ye' wák tso' a' ta es. Wēm ñe' shulétke ye' tö Skèképa Jesús ttò wa wes ye' wák tso' a' ta es. Mik a' ñi dapa'uke etā eē ye' tso'ñak a' ta Wiköl Batse'r wa. Ñies Skèképa Jesucristo diché tso' a' ta. ⁵E' wöshā tā wēm ñe' wömúttśā a' tö Satanás ulā a' as iwák dēr suluë e' wöklör tā iwák tsatkēr mik Skèképa datskene e' kèwö ska'.

⁶A' e' tsòkà taijè sene sulu wa, e' kè dör buaë. ¿Kè a' wā ijcher tö pan wölöwōkà elkela tö harinachka kōs wölöwéka? ⁷Sene sulu e' dör wes pan wölöwōkà kèchke' es, e' tö a' sulu'wèkewā. E' kuèkì ese kōs uyóttśā a' shuā. Es a' dōraë buaë yēsýesè kè a' ì sulu tā'ia wes pan yöule kè a' iwölöwōkà iène es. Cristo kōtewā se' nuì skéie. Ie' dör wes obeja jcheke Judiwak Yépa Yērulune Egipto, e' kèwö tkò'woie es. E' kuèkì ñermata a' batse'oule Skèköl wōā Cristo batamik. ⁸Es kè se' kàne Cristo kōtewā se' skéie, e' kèwö tkò'uk pan yöule iwölöwōkà wa ese wa. Itkò'üsö pan kè yöule iwölöwōkà wa ese wa. E' wā kiane chè tö itkò'üsö kèkraë sene moki yēsýesè ese wa. Kè se' kàne itkò'uk sene sulu tö s'sulu'wèkewā ese wa.

⁹Yèkkuö ièt patkè' ye' tö a' a, e' kì ye' iyé' tö a' kè kàne e' batsök trēr wakpa tā. ¹⁰Erè pè' kè tò Skèköl dalöiè dör trēr wakpa ö ýi kkechök taijè ese wakpa ö akblökwakpa ö ýi diököl dalöiökwakpa, esepa kè chök ye' ku' a' a. Esepa chópa ye' tö, e'ma a' kawōtā duökwa as kè a' e' batsö esepa tā. ¹¹Wépa yè' ye' tö a' a yèkkuö kì, esepa dör wépa e' chò tö ie'pa erblöke Jesús mik esepa. Erè ie'pa dör trēnukwakpa ö ýi kkechök taijè wakpa ö ýi diököl dalöiökwakpa ö s'chök suluë wakpa ö bloblopa ö akblökwakpa. Kè a' e' batsök esepa tā, ñies kè a' chkök esepa tā. ¹²⁻¹³Wépa kè dör Skèképa Jesús icha ¿wes esepa shulèmi ye' tö? Skèköl wák tö ie'pa shuleraë. Erè wépa dör Skèképa icha ñi dapa'uke a' ta, esepa kawōtā shulè a' tö. E' kuèkì a' tö iú wes itso' kitule Skèköl yèkkuö kì es, e' tö ichè: “Yi tö ì sulu wamblé, e' uyóttśā a' shuā.”

A' ñippöke e' shuló a' wákpa tö

6 ¹Mik a' wèle tö ì sulu wamblé iyami eköl kì, etā ¿wes ese mi'ke ie' wā kkatè s'shulökwakpa kè tò Skèköl dalöiè, esepa ska'? ¿Íók e' kè shulè a' wákpa dör batse'r e'pa tö? ²¿A' kè wā ijcher tö se' batse'r, e'pa tö ká i' wakpa shuleraë aishkuö tā? E' dör es, e' tā ¿wes i'ñe tā ýi tsitsirla

¹5.7 pan wölöwōkà kèchke: Judiwak wöblar pan wölöwōkà tso' ie'pa u a e' kōs uyóktśā Ie'pa Yépa Yērulune Egipto e' kèwö tkò'wèketke ie'pa tö e' yökì.

ese è kè shulir a' a? ³ ÌA' kè wà ijcher tò ñies Skèköl biyöchökwakpa shuleraësö? Ie'pa shuleraësö, e' tã ÷wes a' kè a ñippè tso' kã i' kî ese shulir? ⁴ E' kuëkî a' welepa ñippöke ñita, e' tã ÷wes ese mi'ke a' wà shulè pè' bänet ska'? ⁵ I' chéyö a' jaëwoie. Yi a a' shulirmi ÷ese kè ku' a' shuã da'a? ⁶ Erè e' skéie a' mi'ke ñi kkatök s'shulökwakpa kè erblöta' Jesús mik esepa ska'.

⁷ A' ñi kkatöke s'shulökwakpa ska', e' è wa iwënewã tò sene sulu e' alékatke a' kî. Idalè'ttsök bèrè ÷e' kè dör ibua'ie? ⁸ As itö se' íyi ekiblò! ⁸ Erè e' skéie a' wákpa tò ì sulu ñe' wambleke ñi tã dò s'yamipa erblöke Cristo mik esepa íyi ekibleke a' tò.

⁹ ÌA' kè wà ijcher tò wépa dör ì sulu wamblökwakpa, esepa kè dòpa ì blúie Skèköl tso' e' a? Kè a' e' kīt'ò'uk. Wépa dör trënukwakpa, wépa dör íyi diököl dalöiökwakpa, s'senewãbak dalöseukwã wakpa, wépa trër wépa tã, alakölpã trër alakölpã tã, esepa kos kè dòpa ì blúie Skèköl tso' e' a. ¹⁰ Ñies wépa dör akblökwakpa, wépa dör íyi kkechök taië wakpa, bloblopa, s'chök suluë wakpa, esepa kos kè dòpa ì blúie Skèköl tso' e' a. ¹¹ A' welepa bak senuk íyi ekkè wamblök, erè Skèköl tò a' paköa'bak, a' batseö'bak, a' klöo'bak wes pè' buaë yësyësè es iWiköl wa Skèképa Jesucristo ttö wa.

Skèköl kè wà se' tsatkëne as se' tò ì sulu wamblöia

¹² A' welepa tò icheke: “se' wã kawö tso', ì kos kiane wè se' kî, ese woie.” Erè ye' ichè tò kè ì ulitane dör buaë se' a wè. Ye' wã kawö tã ì ulitane woie, erè kè ye' e' mùpattsa as ilè e' alöka ye' kî. ¹³⁻¹⁴ A' welepa tò icheke: “chkè dör s'ñawi a, ñies s'ñawi dör chkè a.” E' yëne erè aishkuö tã íyi böt ñe' ewerawa Skèköl tò. Erè s'chkà kè dör trënoie. Skèköl tò s'chkà shkë'werakane aishkuö tã idiché taië wa wes ie' tò Skèképa Jesús shkëo'kane es. E' kuëkî s'chkà kè meneat trënoie wes a' tò ibikeitseke es, imeneat ì buaë woie Skèképa a, ñies ie' tò s'chkà kkö'neke.

¹⁵ ÌA' kè wã ijcher tò se' batsulewã Cristo mik, e' kuëkî se' chkà dör etkè ie' chkà tã? E' dör es, e' tã ÷wes se' tò s'chkà dör Cristo icha e' ia'wëmikã senukkã alaköl sulusi tã ese wa? iKè se' kane e' ia'ukã yès! ¹⁶ ÌA' kè wã ijcher tò mik yi sené alaköl sulusi tã, e' tã ie'pa bül míã wes wák eköl è es? E' dör wes itso' kitule Skèköl yëkkuö kî es. E' tò wëm ena ilaköl e' chè i' es: “Ie'pa bül serdaë ñita tã ie'pa míã wes wák eköl è es.”^g ¹⁷ Erè yi batsulewã Skèképa Jesús mik, ese dör wes wák eköl è es ie' tã.

¹⁸ E' kuëkî a' tkóshkar trë yökî. Sene sulu skà kos, e' kè tò s'chkà dalösewewã wes trë es. Mik se' trërke, etã s'chkà dör Cristo icha, e' méttasö o'ka kè dör Cristo icha, ese a. E' wa s'wák chkà dalösewewasö. ¹⁹⁻²⁰ ÌA' kè wã ijcher tò a' chkà dör Wiköl Batse'r e' wé? Skèköl tò iWiköl

^g 6.16 Génesis 2.24

mé a' a, e' tso' a' a. Ie' tò a' tɔ'ttsabak, e' ské dör darërë. A' kè dör a' wákpa icha, a' dör ie' icha. E' kueki a' ké senuk yësyesë as ie' kíkarka.

Se' serwā ñita e' pakè

7 ¹I chaki' a' tò ye' a yèkkuò kī, e' wà iuteke ye' tò i'ñe. A' tò ye' a ichaki' tò ÷buaë idör tò se' kè serwā alakölpa ta? ²Erë ye' ichè a' a tò tajë trë tso', e' yöki a' kos maso tsúwā eköl eköl. ³A' wëpa kos kawöta senuk ilaköl ta, es ñies a' alakölpa kos kawöta senuk iwëm ta. ⁴Alaköl chkà kè meneat ie' wák è a, e' meneat ñies iwëm a. Es ñies iwëm chkà kè meneat ie' wák è a, e' meneat ñies ilaköl a. ⁵Ie'pa kè kàne ichkà kkëuk ñi yöki. Erë ie'pa kawö mé ñi a e' batsöktsa ñi yöki ekuölö è ttoie S'yé ta, e' ta e' è dalewa kè ie'pa ñi kópawā. Mik ká e' tka, etā ie'pa ñi kówane dö' Satanás tò ie'pa erkiöwë trënuke, kè ie'pa diché dë'ka e' kkö'nuk e' kueki. ⁶Erë ye' kè ku' a' a ichök tò a' kawöta ñi batsöktsa ñi yöki es, a' kī ikiane, e' ta a' tò iwëmi es. ⁷Ye' a ta sulitane mú dör wës ye' es, kè alaköl ta'. Erë Skëköl tò imé sulitane a' kuak'ki kuak'ki ñi kimoie.

⁸A' wëpa tso'ia ekörla ñies a' wëpa dör schó, esepa a ye' ichè tò buaë idör tò ie'pa mú ser kekraë ekörla wës ye' es. ⁹Erë ie'pa kè e' kkö'nuku' trë yöki, e' ta ie'pa mú maso yulòne senowāie. S'serwā e' dör bua'ie maso kkechekesó ñiè e' tsāta.

¹⁰A' wëpa senewabak, esepa a ye' tò ttè dalöiëno i' meke: a' kè kàne ñi ökwa. Ttè e' kè dör ye' ttè, e' mé Skëképa Jesús tò se' a. Alakölpa kè kàne iwëm ökwa. ¹¹Erë ie' tò iéwā, e' ta ie' kè kàne senukwā wëm o'ka ta, ie' kawöta senuk ekörla kè wëm ta'. Ie' kè senak es, e' ta ie' ké er bua'ukne iwëm kī. Ñies wëpa alaköl ta', esepa kè kàne ilaköl ökwa.

¹²⁻¹⁴A' malepa senewabak, erë e' maso kè erblöta' Jesús mik, esepa a ttè dalöiëno kè meneat Skëképa Jesús wā. Erë esepa a ye' ichè tò a' masopa kè arwa. Iwëm kè erblöta' Jesús mik, isalema e' tsatkërmi ilaköl olomik. Ñies alaköl kè erblöta' Jesús mik, isalema e' tsatkërmi iwëm olomik. Ie'pa ñi éwa, e' ta ie'pa ala'r dör wës pé' kè erblöta' Jesús mik esepa ala'r es, ie'pa tsatkè e' dör darërë. Erë iyé ena imì serke ñita, kè ñi anewa, e' ta isalema ie'pa tsatkërmi iyé ö imì olomik. E' kueki ye' ichè tò a' maso senakia a' ta, e' ta kè iarwa. ¹⁵Erë a' maso kè erblöta' Jesús mik, e' éna a' akwa kró wa, e' ta kè iwöklö'war a' kè klöulewā iulà a. Erë Skëköl tò se' klöo'bak senuk bèrë ñita. ¹⁶E' kueki ibua'ie dör tò a' sermiia bèrë ñita. A wëm ÷i tò be' a ichök tò be' alaköl kè tsatkërpa be' olomik? A alaköl ÷i tò be' a ichök tò be' wëm kè tsatkërpa be' olomik?

¹⁷E' dör wës ttè wa ye' tò Skëképa Jesús icha erule erule e'pa ulitane wöbla'wëke ká wa'ñe es. Ye' tò ie'pa a ichè tò wës a' ku' Skëköl tò mik a' klöo'itö iwák a etā, es a' atú bër. Ie' tò ieri mé a' a seno eköl eköl es. ¹⁸Wëpa tottola kkuölit tëule tsir, mik ie'pa klöo' Skëköl tò iwák a etā, esepa kè kàne e' mane'ukne wës. Es ñies wëpa kè wakyöule es, mik

Skëköl tō ie'pa klōo' etā, esepa kē kàne e' wakyüök. ¹⁹Se' wakyöule ö kē se' wakyöule e' ska' Skëköl kē tkine yēs. Ie' ttē dalöiëno, e' dalöiekesö, e' je' kī ie' tkirke. ²⁰A' kōs e' tsūat wēs a' dör mik ie' tō a' klōo' iwák a etā es. ²¹Mik ie' tō a' klōo', etā ça' klöulewā kanè mésoie? e' tā kē a' tkinuk e' kī. Erē a' a kawō tso'ia e' yöktsā e' ulā a, e' tā a' e' yōttsā. ²²Mik ie' tō a' klōo', etā a' klöulewā kanè mésoie, e' tā e' yē'ttsā ie' tō sene sulu ulā a kanebloie Skëkëpa Jesús a. Es ñies mik Skëköl tō a' klōo', etā a' kē dör kanè méso ñe'se, e' tā e' klōo' Cristo tō ie' wák kanè mésopaie. E' kuekī a' klöulewā kanè mésoie, e' tā kē a' tkinuk e' kī. ²³Skëköl tō a' to'ttsabak, e' kuekī kē a' e' tiükne yile skà ttē dikia. ²⁴A yamipa, wēs a' ku' Skëköl tō mik a' klōo'itō etā, es a' atū bër. A' senú buaē yēsýēsē ie' a, sene me'itō a' a e' a.

²⁵Ima a' tō ye' chaki' yëkkuö kī wépa tso'ia ekörla, esepa kī, e' iuteke ye' tō i'ñe. Ese ttē kē mène ye' a Skëkëpa Jesús wā. Erē ima ibikeitsëyö, e' chekeyö a' a. Skëköl ye' sué er siarë wa e' wa iëri méitö ye' a iwā jchenowā buaë. E' kuekī i chekeyö e' mik a' erblömi. ²⁶I'ñe tā se' serke kawō darërë a, e' kuekī ye' a tā buaë idir tō se' kōs e' tsūat wēs s'tso' es. ²⁷Wëm senewābak, ese kē tō ilaköl ökwa. Wëm duria ekörla, ese tayë kē yular. ²⁸Erē wëm senéwā, e' tā buaë idir. E' wa ie' kē wā i sulu wamblène. Ñies alaköl kam serwā, ese senéwā, e' tā e' dör buaë. E' wa ie' kē wā i sulu wamblène. Erē wépa senewābak, esepa we'ikëmi ká i' kī s'weirke ese tō tkökā wépa kē senewābak esepa tsatā. E' yökī ye' éna a' tsatkak, e' è kuekī ye' ichè tō buaë idir tō a' ser ekörla.

²⁹⁻³¹A yamipa, ye' ichè tō kē se' a kawō ta'ia taië. Wēs ká i' dör i'ñe tā e' erkewatke. E' kuekī i'ñe tā ena kekraë kē se' kàne senukia er me'rie i tso' ká i' kī ese kī. Se' senewābak, esepa kē er mukwā e' kī. Se' iuke siarë, esepa kē er mukwā e' kī. Ñies se' tts'erke buaë, esepa kē er mukwā e' kī. Se' tō i tuë ta', esepa kē er mukwā i tso'rak iwā ese kī. Se' serke buaë i tso' ká i' kī ese mik, esepa kē er mukwā ese kī.

³²Ye' kī ikiane tō a' mú tts'er buaë, kē tkir i kī. Wépa serke ekörla, esepa wā kawō tso' kibiie Skëköl íyi sauk ena i wër buaë ie' wa ese uk. ³³Erē wépa senewābak, esepa kawōtā i tso' ká i' kī ese sauk as iwër buaë itayë wa. ³⁴Es ie'pa kī íyi böt kané tso'. Es ñies alakölpa dör schó ena busipa wëm kē ta', esepa wā kawō tso' kibiie Skëköl íyi sauk. Ie'pa e' mumittsa senuk batse'r. Erē alakölpa senewābak, esepa kawōtā i tso' ká i' kī ese sauk as iwër buaë iwëm wa. ³⁵Ttē ekké chéyö a' kimoie, kē dör a' wöklö'woie. Ye' kī ikiane tō a' ser buaë yēsýēsē Skëköl è a, kē wötkekü' i tō.

³⁶Wépa ttē meuletke tayë a senukwā, esepa wele tō ibikeitsè: “Tayë duéswö detke senowā, ñies ye' kē a seneia ekörla. Bua' idir ye' a senukwā ie' ta”, e' tā esepa a ye' ichè tō a' senakwā, e' tā a' senúwā, e' kē dör suluë. A' senúwā. ³⁷Erē wépa ttē meuletke tayë a senukwā, erē esepa kē

éna senakwaia, e' ta esepa a ye' ichè tò e' dör buaè tò a' kè serwa. Erè a' kawöta ibikeitsökwa bua'iewa kewe tò a' wákpa er wa a' kè senakwa. Nies a' kawöta isauk buaè tò kè yi ku' a' a ichök tò kè a' senukwa. A' tò ibikeitsétke tò a' senak ekörla kekraë, e' ta bua' idir tò a' kè serwa. ³⁸Es ye' tò ichè tò wépa senéwa, esepa tò iwé buaè. Erè wépa kè sene'wa, esepa tò iwé bua'ie.

³⁹Alaköl senewabak, e' kawöta senuk iwëm è ta dò mik iwëm blénewa eta. Iwëm blénewa e' ta ie' serwamine wëm o'ka ta. Erè ie' kawöta senukwa wëm erblé Skékëpa mik ese è ta. ⁴⁰Erè ye' ichè tò bua' idir ie' a' tò ie' mú ser ekörla, kè senewane. E' tò ie' ttsé'weraë buaè shute. Ye' tò iklö'wé tò ye' a' Skéköl Wiköl tso' nies, e' kueki ye' tò a' ichè es.

Iyiwak jchëule íyi diököl tso' dalöiè ese a, e' pakè

8 ¹Chkè meule íyi diököl tso' dalöiè ese a, ese ki a' tò ye' a' ichaki' yëkkuò ki, e' iutekeyò i'ñe.

Ima a' tò íyi diököl ñe'se ché, e' dör moki e' jcher se' wa. Erè kè a' éna ichökwa tò se' wa íyi jcher, e' tò se' kèmi e' ttsökka taiè s'malepa ki. Erè s'malepa dalëritsesö, e' tò ie'pa diché kí ieraë. ²Yi e' bikeitsò tò ie' wa íyi jchertke taiè, e' wa iwënewa tò kam ie' wa ijcher wes ikawöta jchenuk es. ³Erè yi tò Skéköl dalëritseke, ese mik ie' batsë buaè.

⁴Chkè meule íyi diököl tso' dalöiè ese a ese katèsö, e' ki a' tò ye' a' ichaki'. Se' wa ijcher buaè tò íyi diököl ñe'se wák kè ta', e' kueki kè idör iie bua'. Skéköl chökle, e' dör eköl è. ⁵Pè' kè tò Skéköl dalöiè, esepa tò iklö'wé tò ì dalöiekerakitò, esepa tso' taiè serke ká jaì a' ö ká i' a. Esepa kíerakitò kéköl ö skékëpa. Moki esepa tso', ⁶erè Skéköl dalöieke se' tò, e' dör Skéköl eköl ème e'. Ie' dör S'yé. Ie' dör íyi ulitane wì, nies se' tso' ie' è a. Nies Skékëpa dör eköl è, e' dör Jesucristo. Íyi ulitane tso' ie' mik, nies se' tso' ie' mik.

⁷Erè kè s'yamipa ulitane éna iwà ane buaè tò íyi diököl tso' dalöiè, ese kos kè wà ta'. Ie'pa bak íyi diököl ñe'se dalöiök, e' kueki e' tso'ia ie'pa er a' dò ikké ta. Mik ie'pa tò chkè meule íyi diököl a, ese katé, eta' e' ki ier tò ikkaté. Ie'pa diché kè dè'ka ierbikò es, ese wöklö'woie. E' kueki ie'pa tò ittse tò iianekane ñaie. ⁸Se' bats Skéköl mik e' kè dör chkè wa. Ì katekesö ö ì kè katèsö e' kè a se' onuk buaè ö sulué ie' wöa. ⁹E' jcher a' wa, e' kueki a' tò iklö'wé tò chkè kos katèmi a' tò. E' yène, erè a' e' kkò'nú as kè a' ukuömik s'yamipa kam éna iwà ar buaè, esepa ardöne sene sulu a. ¹⁰Ichòsò tò be' éna iane buaè, e' mía e' tkéser chkè meule íyi diököl a, ese katök iwé a. Erè e' dalewa s'yami kam éna iwà ar buaè ese eköl tò be' sué chkök ta' e' tò ie' erkiöwéka ta' imía ta' ikatéitò nies. ¹¹Be' tò iwé es, e' ta' e' wa be' tò se' yami, kè diché dè'ka wè', e' émine sene sulu a ta' isulurdawa be' ukuömik. Ie' dör s'yami, nies Cristo e' mettsa ttèwa ie' skéie. Be' tò iwé es, e' ta' be' tò ì sulu wamblé s'yami ki. ¹²Se' tò s'yamipa

kam éna iwà ar buaë, esepa kî ì sulu wamblé es, e' tã ñies se' tso' ì sulu wamblök Cristo kî. ¹³E' kuekî ye' ichè tò s'yami wele armine sene sulu a ye' ukuömik, iyiwak chkà katéyö e' kuekî, e' tã kè ye' tò ikatepaiane.

Pablo tö ikanè tsátké

9 ¹¿Wes a' tö ibikeitsèmi tò ye' kè a kawö tã' ì wöie wes ye' kî ikiane es? Wësua a' tö ibikeitseke tò ye' kè dör Jesús ttekölpa tsá e'pa eköl. Erë ye' tö Skëképa Jesús su' ye' wák wöbla wa, e' kuekî mokî ye' dör ie'pa eköl. A' dör ye' kanëblöke Skëképa a e' wà. ²A' wakpa kî iwënewa tö mokî ye' dör Jesús ttekölpa tsá e'pa eköl. O'kapa tö ichèmi tò ye' kè dör es, erë e' kè yënuK a' a.

³Wépa tò ye' ché es, esepa yökî ye' e' tsátköke i' es. ⁴¿Wes a' ibikeitsèmi tò wépa wöbla'wekeyö, esepa kè kawötã ye' kîmuk inuköl wa chkoie di' yöie? ⁵Ñies ¿ïma a' ibikeitsè tò ye' kè a kawö tã' senukwã tayë erblöke Jesús mik ese tã tsèmi e' tã wes Jesús ttekölpa malepa ena Jesús ëlpa ena Pedro e'pa tò iweke es? ⁶¿ïma a' ibikeitsè tò ye' ena Bernabé, sa' bö! è kawötã kanëblök sa' wákpa ulà wa e' kkö'noie? ⁷¿Wé a' wã isuule tò ñippökwakpa mi'ke, erë iwákpa e' kkö'nuke ichkè wa idi'yè wa? ¿Wé a' wã isuule tò iyiwö tkèsö, erë kè sö iwà katëpa? ¿Wé a' wã isuule tò yi tso' chibo kkö'nuk, erë ese kè tò chibo tsu'diö yëpa? ⁸⁻⁹Ï chök ye' tso' a' a, e' kè bikeitse s'ditsö è wã, ñies itso' kitule Moisés tté dalöiëno kî, e' tò ichè i' es: “Baka wë'ñie tso' kanëbloie trigo wöttsoie, e' kè kawö tã' kkö' payuëwã itso' kanëblök e' dalewa as trigowö katöitö.” ¿ïma a' ibikeitsè? ¿Tté dalöiëno e' me'at Skëköl tò baka wë'ñie è kkö'noie? ¹⁰Au, ie' tò ime'at se' a' ñies. Wépa tò iyiwö tkeke ena wépa tò ishteke, esepa tö iwakanewëke ie'pa tò iwö kak paneke e' kuekî. ¹¹Es ñies sa' tö Wiköl Batse'r íyi tsá paka' a' a, e' dör wes iyiwö tkèsö es, e' kuekî kè idör suluë tò a' tò sa' kîmù ì tso' a' wã ese wa, e' dör wes iyiwö shtekesö es. ¹²A' wöbla'ukwakpa skà e' kkö'nuk a' kawötã, e' yitã buaë a' kawötã sa' kkö'nuk.

Erë e' wà kè kine sa' wã a' a. Mik sa' bak a' ska', e' sa' kè wã a' íyi kàne e' kkö'noie. Sa' kanëblé' sa' wákpa ulà wa e' kkö'noie. E' dör darërë sa' a, erë e' kôs dalë'ttsé' sa' tò as kè ì tò a' wöklö'ñü Cristo tté buaë e' klö'uk. ¹³A' wã ijcher tò wépa kanëblöke Skëköl wé tso' Jerusalén e' a, esepa serke ì kanewëke ie'pa tò ese mik. E' wà dò tò iyiwak jcheke ie'pa tò ka' tso' imokã Skëköl a e' kî, ese chkà kak tsekeat ie'pa tò katè. ¹⁴Es ñies Skëképa Jesús tö iyë'at tò wépa kanëblöke ie' a itté buaë pakök, esepa serdaë kanè e' mik. ¹⁵Erë ye' kè wã íyi ikkè kine a' a yës. Ñies ye' kè ku' i' chök a' a as a' tò ye' a imù. Ye' tò Jesús tté buaë pakeke éme, e' tò ye' ttsé'weke buaë shütë. E' kè yepattsa yi tò ye' ulà a. Ye' a tã buaë idir tò ye' duöwã, erë ye' kè tò a' ulà a ì klö'wëpa.

¹⁶Erë ye' patküle Jesús tté buaë pakök, e' kuekî e' wa ye' kè a e' ttsënuKã yës. Ye' kawötã iwà pakök. Ye' kè tò ipakè, e' tã iwëstela ina

ye' ta! ¹⁷Ipakópayö ye' wák er wa, e'ma ye' wa kawö ta' s'ña'woje iki. Erë kanè e' me'at Skèköl tò ye' ulà a, e' kuèki ye' kawöta ipakök. ¹⁸E' dör es e'ma ìl dör iské ye' a? Ye' ttsè'ne buaè ipakök éme e' dör iské ye' a. E' wà kiane chè tò eré ye' wa kawö ta' senuk ye' kanè e' wa, eré e' kè ki ye' s'ña'weku' yès. E' tò ye' ttsè'weke buaè shute.

¹⁹Eré ye' kè dör yi kanè méso, eré ye' e' mettsa sulitane kanè mésoie as kos ie'pa erblòmi Jesús mik, ekképa dō erblök imik. ²⁰Mik ye' tso' judiowak shua, eta ye' serke wes sa' judiowak ser Moisés ttè dalöiëno dikia es as ie'pa erblò Jesús mik. Eré ye' kè ku'ia Moisés ttè dalöiëno e' dikia, eré mik ye' tso' ie'pa shua, eta idalöiekeyö as ie'pa erblò Jesús mik. ²¹Es nies mik ye' tso' pè' kè dör judiowak esepa shua, eta ye' serke wes ie'pa ser es as ie'pa erblò Jesús mik. (Eré kè ì sulu wambleku'yö. E' wà dör tò eré ye' kè ku'ia Moisés ttè dalöiëno e' dikia, eré ye' tso'ia Skèköl ttè dalöiëno e' dikia, ye' tso' Cristo ttè dikia e' kuèki.) ²²Mik ye' tso' s'yamipa kam éna Jesús tté wà ar buaè, esepa shua, eta ye' serke wes ie'pa ser es, as ye' a ie'pa kimer as ie'pa éna iwà ar buaè. Es mik ye' tso' pè' shua eta ye' serke wes ie'pa es as wes alé ie'pa welepa tsatkër. ²³Ì kos wekeyö e' dör Jesús tté buaè kī shkōwoje as iwà dōñak ye' ulà a.

²⁴A' wa ijcher tò mik se' turke tseè isuoie tò wé e' alömi, eta iturkerak seraa, eré eköl è e' alömi, ese ulà a iské dōraè. E' sū a' senú Skèköl a buaè as iské dō a' ulà a wes wé e' alé ese ulà a iské de es. ²⁵Tunukwakpa ulitane e' kkō'nuke, e' yuōke kekraè e' aloka imalepa ki. Ì kos tò ie'pa wöklö'wèmi, e' olo'yeke ie'pa tò. E' kos weke ie'pa tò as kal kō yuekerakitö wōshkiie^h tkèka iwökir ki, ese dō ie'pa ulà a ie' alérak e' skéie. Iské e' chklörta'wa, eré se' iyuleke, e' dör yöbiè kè chklörta'wa. ²⁶Ye' serke Skèköl a wes yi tur e' aloka ese es, kè dör wes tunukwak turke éanas ese es. Ye' kè dör wes nippökwaq tò iulà tsiní uyeke é siwa' ki, kè wà ta' ese es. ²⁷Ye' e' wöklö'uke darèrè, ye' chkà kekeyö kèsik wa as tò iū wes Skèköl ki ikiane es. E' wekeyö es dō' ye' s'patté taiè Skèképa ttè wa, eré ye' wák kè ulà a iské dō.

Kè a' minuk íyi diököl dalöiè ese wé a

10 ¹A yamipa, ye' kè ki ikiane tò a' éna ichòwa tò ì bak se' yamipa bak ká iaiaè Moisés kéwö ska' e'pa ta. Ie'pa kos wéttsé' Skèköl tò mò ar taiè e' wa. Nies Skèköl diché wa ie'pa kos baktsa klò wa dayè kiè Dayè Mat, e' shua kè nune'ka dayè wa. ²E' dör wes ie'pa wösunerak mò a ena dayè a es iwà kkachöie tò ie'pa batsulewa Moisés mik. ³Es nies chkè mé Skèköl wák tò ie'pa a, e' è né ie'pa ulitane tò. ⁴Nies di' mé ie' wák tò ie'pa a, e' è yé ie'pa ulitane tò. Di' e' dōwéttsaitö ákkuö a. Ákkuö

^h9.25 kal kō yöle wōshkiie: E' merke tunukwakpa e' alé esepa a, e' kkecheke ie'pa tò taiè. Wé ki itkènekā ese wák dalöiërta' taiè.

e' tō Cristo wà ché, e' mir ie'pa tã kəkraë ikimukrak. ⁵Erë ie'pa kibiiepa kè wër Skəköl wa buaë. E' kuëkì ie'pa kibiiepa durulune, nu atë tkëter ká wa'ñe ká sir poë e' kì.

⁶E' kōs tka ie'pa tã se' a iwà kkachōie tō kè se' kàne ì sulu kkechök wës ie'pa tō ikkeyë' es. ⁷Se' kè kàne íyi diököl dalöiök wës ie'pa wēlepa tō idalöië' es. Ì wamblë' ie'pa tō e' tso' kitule Skəköl yëkkuö kì. E' tō ichë: “Ie'pa e' tulëwã chkök di'yök taië buaë íyi diököl dalöioie. E' ukuökì tã ië' kékarak klötök trë nuk ì sulu wamblök taië e' ttsë'wokarak buaë.”⁸Kè se' kàne trë nuk wës ie'pa wēlepa trënerak es, e' nuí kì ie'pa taië e'pa durulune ká etkè a dökã 23,000. ⁹Kè se' kàne Cristo wōnatkök ì sulu wa wës ie'pa wēlepa iwōnatkë' es, e' nuí kì ie'pa kōtulus tkabè wa. ¹⁰Kè se' kàne kköchökã Skəköl wōã wës ie'pa wēlepa kköyë'kã es, e' nuí kì S'ttökulurwak tō ie'pa kōtulus.

¹¹Íyi ekkë kōs tka s'yamipa bak ká iaiaë, e'pa tã iwà kkachōie se' a tō se' kè kàne ì sulu wamblök wës ie'pa es. E' kōs kiteat Skəköl yëkkuö kì se' serke i'ñe tã ká i' erkewatke e' këwö ska', esepa a ikkachōie tō wépa tō Skəköl watéttsã, esepa weirdaë inuí kì.

¹²A' wēlepa e' bikeitsò tō “ye' e' tkéwã darërë Jesús mik, kè ye' arpamine ì sulu a.” Ese wakpa kawõtã senuk erkì as kè iarmine ì sulu a. ¹³Se' erkirke ì sulu wamblök, ese kōs tköke sulitane tã. Erë Skəköl ttö mokjë, ie' kè tō se' mepattsã tō ì sulu tō se' erküwë taië shütë kè se' a iwöklör ekkë. Mik se' erküwëke ì sulu tō, etã ië' tō se' a ikkacheraë wës se' tköshkarmi iulã a as se' a iwöklör.

¹⁴A yamipa, a' dalër taië ye' éna, íyi diököl tso' dalöië ese kōs yöki a' tkóshkar bánet. ¹⁵A' kabikeitsò buaë, e' kuëkì ì chekeyö a' a, e' bikeitsó tã a' isueraë tō mokjë idir. ¹⁶Mik se' ñì dapa'uke Cristo kōtëwã e' këwö tkö'uk, etã wëstela chësö Skəköl a' vino yekesö ñita tka' etkè a' e' kì. Vino ñe' tō ië' pé tène taië s'tsatkoie e' wà chë. E' wa se' kōs tso' batsulewã ië' mik. Ñies pan etö è blatesesö ñi a' e' ñekesö ñita. E' tō ië' chkà wà chë. E' wa se' kōs tso' batsulewã ië' mik. ¹⁷Se' dör taië, e' kōs tō pan etö è e' ñeke, e' kuëkì se' kōs dör wës wák eköl è es.

¹⁸Ì wëke Israel aleripa tō e' wà bikeitsó. Mik ie'pa tō iyiwak jcheke kã' tso' imokã Skəköl a' e' kì, etã wépa tō ese chkà kak kateke, esepa kōs tso' ië' dalöiök ñita. Es ñies a' mi'ke íyi diököl dalöio wé a, tã chkè meule íyi diököl a, ese kak katé a' tō, e' tã a' tso' idalöiök ie'pa tã ñita. ¹⁹E' wa ye' kè ku' ichök tō íyi diököl ese ena chkè meule iã ese diché tã'. ²⁰Au, kè idör es. Ye' tso' ichök tō pë' kè tō Skəköl dalöië esepa tō iyiwak jcheke mè íyi diököl a, ñermata e' meule aknamapa a, kè meule Skəköl ichók e' a. Ye' kè kì ikiane tō a' e' tiü aknamapa íyi shuã yës. ²¹A' kè a' Skëképa Jesús tka' ena aknamapa tka' e' wà yanuk ñita. A' kè a' Skëképa chkè ena

¹ 10.7 Éxodo 32.6

aknamapa chké katanuk ñita. ²²Iwésö es, e' ta s'tso' Skëképa tsiriuk as isibirka s'ki. Ie' uluneka s'ki, e' ta ¿wes e' dalé'ttsérmi sia?

Ì kòs ú Skëköl è kíkoka

²³A' welepa tò icheke tò “se' wa kawö tso', ì kòs kiane se' kì wè, ese woie.” E' yène erè kè ì ulitane e' dör buaë se' a wè. Ì kòs kiane se' kì wè, e' wèmisö, erè kè ì ulitane a s'yamipa er diché iënu. ²⁴Se' kè kàne tkinuk se' wák è kì. Ñies s'kawöta tkinuk s'malepa kì.

²⁵⁻²⁶Skëköl yëkuö tò ichè: “Ká i' ena íyi kòs tso' iki, e' dör Skëköl icha.” E' kueki iyiwak chká watörke iwé a, ese kòs katèmisö. Kè iwà chakar tò imeule íyi diököl a ö au as s'er kè tò s'kkatò iki.

²⁷Yi kè erblöta' Jesús mik, ese eköl tò a' wele kié chkök ie' ta, ta a' shkak, e' ta a' yú. Ì kòs wà a' dène e' kató bèrè kè ichakar as a' er kè tò a' kkatò iki. ²⁸Erè o'ka tò a' a' ichè: “Iyiwak chká se' meule íyi diököl a”, e' ta kè ikatar ie' dalèrmik, ñies erbikè dalèrmik. ²⁹Ye' tso' ie' erbikè chök, ye' kè ku' a' erbikè chök.

Ye' a' kawö ta' iyiwak chká ulitane katök, ¿wes e' kè katèpayö, imène sulu o'ka kì e' è kueki? ³⁰Ì kateke ye' tò, ese kì ye' tò wèstela cheke Skëköl a, e' ta ¿wes e' sulurmi o'ka yöki? ¿Wes e' kì ie' tò ye' chèmi suluè?

³¹E' kueki ì kòs yekesö, ñekesö, ñies ì kòs wèkesö, e' üsö as Skëköl kíkarka. ³²A' senú wösh wa as kè yi wöklör a' ukuömik. Judiowak idir ö kè idör judiowak ö wépa dör Skëköl icha ese idir, ese kòs kè wöklö'war. ³³A' senú wes ye' serke es. Ye' wák e' ché senuk kekraë as e' wër buaë sulitane wa. Ye' kè tkirku' ye' wák kì. Ye' tkirke sulitane kì ie'pa kimoie as itsatkèrdak.

11 ¹A' senú wes ye' serke es. Ye' serke wes Cristo ser es.

Wes alakölpä kawöta e' uk mik se' ñi dapa'uke eta

²Kekraë a' er arke ye' ska'. Ñies ì kòs wa ye' tò a' wöblaö', e' wekeia a' tò. E' kueki ye' tso' a' kíkokka. ³Erè ye' kì ikiane tò a' wa ijcher tò Cristo dör wépa dör ie' icha esepa kòs wökir. Ñies wëm dör alaköl wökir. Ñies Skëköl dör Cristo wökir. ⁴Mik a' ñi dapa'uke ttök Skëköl ta, eta a' wépa welepa ttöke ie' ta ö ilè chekerakitö ie' ttekölie ta iwökir pabakekewaitö, e' ta e' wa ye' dör iwökir e' dalösewewekewaitö. ⁵E' skéie kè dör es alakölpä a. Ie'pa ttöke Skëköl ta ö ilè chekerakitö ie' ttekölie, kè wökir pabakulewa, e' ta e' wa ie'pa tò ye' dör iwökir e' dalösewéwa. Ie'pa dör wes alakölpä tsà tò dabebe esepa es. ⁶Alaköl wele kè éna iwökir pabakakwa, e' ta ese mú tò itsà tèe wes wëm es. Erè e' dör jaë taië ie' a. E' kueki buaë idir ie' a tò iwökir pabakòwa. ⁷⁻⁹Skëköl tò wëm yö' wes

ie' wák es, e' kuekí wés ie' dör e' wërke wëm kî. E' kuekí wëpa kè kàne iwökir pabakökwa mik ittöke ie' tã e' dalewa. Erë alaköl dë'kã wëm wa, e' kè dör tö wëm dë'kã alaköl wa. Nies alaköl yöne wëm kuekí ikimoie, e' kè dör tö wëm yöne alaköl kuekí. E' kuekí wés wëm dör e' wërke alaköl kî. ¹⁰E' kuekí alakölpa ké e' wà kkachök iwökir pabakëwa wa. Nies ie'pa ké e' uk Skëköl biyöchökwakpa kuekí. ¹¹Erë alakölpa ena wëpa batsulewa Skëképa mik esepa kè meneat ulawa ulawa ñi yöki. E' skéie imeneat ñi kimuk ñi dalöiök. ¹²Mokí tö alaköl tsá dë'kã wëm tsá wa. Erë ñies e' ukuökí tã wëpa ulitane kurke alaköl wa. Erë se' kos ena íyí kos, e' dë'kã Skëköl wa.

¹³A' wakpa tö ibikeitsó. ¿Buaë idir tö alakölpa ttöke Skëköl tã wökir kè pabakule? ¹⁴Sulitane wã ijcher tö iwake! meneatbak tö wëm tsá batsí, e' dör jaë. ¹⁵Erë alaköl tsá batsí, e' mène ie' a iwökir pabakoie, e' kuekí e' mène buaë ie' kî ikikoka. ¹⁶Yile kè wã ye' sini'kune, e' tã ese éna íanú tö se' dör Skëköl icha erule erule ñi dapa'uke kã wa'ñe, e'pa kos wöblar tö alakölpa ttöke Skëköl tã wökir pabakulewa.

Wés se' ké Skëképa kötëwa e' këwö tkö'uk

¹⁷Í cheke ye' tö a' a' í tã, e' kè kî ye' a' a' peñanuk. Mik a' ñi dapa'uke, etã e' wà dettsã suluë ichök ì buaë tsatã. ¹⁸Këweie yö ichè tö ye' wã ibiyó jcher tö mik a' ñi dapa'uke, etã a' ñi blabatsélor. Wele tã ye' iklö'wé tö e' dör mokí. ¹⁹Mokí e' dör buaë tö a' ñi blabatsó as iwërwa a' shua tö a' wëpa wër mokí Skëköl wa buaë. ²⁰⁻²¹Mik a' ñi dapa'uke Skëképa kötëwa e' këwö tkö'woie chkè wa di'yè wa, etã a' wákpa tö a' chkè ñéwa kè wã iyamipa kè wã ì tã' esepa bikeitse. Bataie tã a' welepa atë kè chkaule welepa e' ttëkã taië blo' wa. E' wa ì ché a' tö tö ikëwö tkö'weke a' tö e' dalösewëwa a' tö. ²²Wësua a' kè u tã' chkoie di'yoie. Wësua se' dör Skëköl icha e'pa dalösewëkëwa a' tö. Wësua a' éna s'yamipa dör siarë, esepa jaëwakkã. ¿Ì chëmiyö a' a' íyí ekkè kuekí? ¿A' kî ikiane tö ye' tö a' peñè iki? Au, ye' kè tö iwëpa.

²³Skëképa Jesús tté meneat ye' a' paka'neyö a' a, e' dör i' es: Nañewe kam ie' merttsã, e' yöki ie' tö pan klö'wé. ²⁴E' kî wëstela chéitö Skëköl a. E' ukuökí tã iblatéitö tã iché: “Pan i' dör ye' chkà merdattsã a' tsatkoie i'. I' ú këkraë as a' er arne ye' ska!” ²⁵Es ñies mik ie'pa chké one tã tka' a vino tkër, e' klö'wéitö tã iché: “Vino i' dör ye' pé. Ye' tterawã e' pé tërdaë, e' wa ttè pa'alí me' Skëköl tö, e' wà de. Bitökicha a' tö iyeke, etã a' er anú ye' ska!” ²⁶Es bitökicha a' tö pan ñe' ñé ena vino ñe' yé, e' wa a' tso' ichök tö ie' kötëwa se' skéie. Es a' tö ichè michoë dò mik ie' datskene etã.

²⁷E' kuekí yi isie tö pan ñe' ñé ena vino ñe' yé, erë kè iserku' wés kawö tkö'weke ñe' wà kiane ché es, e' tã esepa tso' Skëképa chkà ena ipé dalöseukwa. ²⁸⁻²⁹Íñésö ena iyésö, erë s'yamipa malepa dör wés wák eköl è es se' tã Skëképa batamik, esepa dalösewëwasö, e' tã Skëköl wö

kiekesö e' k_i. E' kuek_i se' k_{os} eköl eköl kawötä e' sauk kewe tö is s'tso', e' ukuök_i tä pan nū ena vino yó. ³⁰Erë a' kè ku' iwä dalöiök es. E' kuek_i a' tajë kirirke ianewä alabëbë, ñies a' welepa duolur. ³¹Se' e' suë buaë, e'ma Skëkëpa kè tö se' shulepa. ³²Erë ie' tö se' shuleke, e' tä e' dör se' kimoie as se' kè kichatër aishkuö tä wëpa kè tö ie' dalöieta' esepa tä ñita. ³³A yamipa, mik a' ñi dapa'uke chkök ñita Skëkëpa kötewä e' këwö tkö'woie, etä a' ñi panú. ³⁴A' wëpa dué bli wa, e' tä esepa chkóbitü iwák u a as a' kè tö Skëköl wö kiö e' k_i a' ñi dapa'uke chkök ñita e' wa. Íyi malë kianeia shulë, ese shulekeyö mik ye' dene a' ska' eta.

Ì merke Wiköl Batse'r wa e' pakè

12 ¹A yamipa, i' tä ye' tö ì merke Wiköl Batse'r wa se' a e' tté pakeke a' a. Ye' k_i ikiane tö a' éna tté e' wä ar buaë. ²A' wä ijcher buaë tö kenet tä kam a' tö Skëköl dalöiö, e' yök_i a' bak e' muktsa wëttsè wes alë íyi diököl kè ttö tä', ese dalöiök. ³E' kuek_i i'ñe tä ye' k_i ikiane tö a' wä ijcher tö wëpa ttöke Skëköl Wiköl wa, esepa kè tö ichepa: “iJesús mú kichatër!” E' sù wëpa kè ttöku' Wiköl Batse'r wa, esepa kè tö ichepa mok_i: “iJesús dör sulitane Këköl!”

⁴Ì mène se' a ñi kimoie ese dör kuä'k_i kuä'k_i, erë e' wì dör Skëköl Wiköl eköl è. ⁵E' sù kanè tso' se' wä s'kimoie ese dör kuä'k_i kuä'k_i, erë e' wì dör Skëkëpa Jesús eköl è. ⁶E' sù ì wëkesö ese wä dökettsa kuä'k_i kuä'k_i, erë e' wì dör Skëköl eköl è, e' tö iwakaneweke se' a as iwä döttsa wes ie' k_i ikiane es. ⁷Se' k_{os} eköl eköl a imène Skëköl Wiköl wa s'malepa kimoie. ⁸Welepa a imerke Skëköl Wiköl wa Skëköl siwë iskië e' pakoie. Welepa skà a Wiköl e' è wa imerke tté blëule ese wä pakoie. ⁹Welepa skà a imerke Wiköl e' è wa erbloie Skëköl mik bua'ie. Welepa skà a imerke Wiköl e' è wa s'duöke ese bua'wone. ¹⁰Welepa skà a imerke ì kè or yi a ese woie. Welepa skà a imerke ttoie Skëköl ttekölie. Welepa skà a imerke isuöie tö yile kapaköke ese dör Skëköl tté mok_i ö au. Welepa skà a imerke ttoie ttö kuä'k_i kuä'k_i wa. Welepa skà a imerke wëpa ttöke ttö kuä'k_i kuä'k_i wa, ese wä pakone. ¹¹Erë ekkè k_{os} dör Skëköl Wiköl eköl è e' kanè. Ie' tö imeke se' k_{os} a eköl eköl wes ie' k_i ikiane es. ¹²⁻¹³Se' dör Cristo icha e'pa dör wes wák eköl è es. Se' ulà tä', klò tä' ena se' yese skà tso' tajë, erë e' k_{os} wöiëulewä etkëme. Es ñies se' dör kuä'k_i kuä'k_i. Se' welepa dör judiowak, se' welepa skà kè dör judiowak, se' welepa klöulewä kanè mésoie, se' welepa skà kè dör es. Erë se' k_{os} iënewä Skëköl Wiköl a, e' è a se' k_{os} tso'. E' wa se' de wes wák eköl è es Cristo tä ñita.

¹⁴S'chkà kè dör etkëme, iyese tso' tajë kuä'k_i kuä'k_i. ¹⁵Ichòsö tö s'klò mú tö ichè: “Ye' kè dör ulà, e' kuek_i ye' kè ku' chkà mik.” Ie' tö ichèmi es, erë ie' tso' chkà mik. ¹⁶S'kukuöña mú tö ichè: “Ye' kè dör wöbla, e' kuek_i ye' kè ku' chkà mik.” Ie' tö ichèmi es, erë ie' tso' chkà mik. ¹⁷S'chkà k_{os} e' mú dör wöbla è, e'ma ¿wes ì ttsëmisö? S'chkà k_{os} e' mú dör kukuöña

è, e' ma ì wa íyi alar ttsèmiso? ¹⁸ Erë Skëköl kè wà se' chkà yöne es. Ie' tò ì kòs tso' s'chkà mik, e' méat wé ie' kī ikiane mèat eē as ikaneblò buaè ñita. ¹⁹ Es s'chkà ulitane mú dör wöbla è ö kukuöña è, e' ma s'chkà kè dör mokī. ²⁰ Erë kè idör es. S'yese tso' taijè.

²¹ E' kueki s'wöbla kè a iyënuκ s'ulà a: “Be' kè dör iie bua' ye' a.” Es ñies s'wökir kè a iyënuκ s'klò a: “Be' kè dör iie bua' ye' a.” ²² E' skéie, s'chkà wésele bikeitsekesö tò kè ia ì or buaè, e' kè ta' etā kè se' serpa. ²³ S'chkà wésele kī se' jaërke, kè kkayër ta', ese paiekesö buaè datsi' wa kkö'neke buaè. ²⁴ Erë s'chkà wésele kè kī se' jaërku', e' kè paieku'sö datsi' wa. S'chkà wésele bikeitsekesö tò kè idör buaè chökle, ese kkö'nekesö bua'ie. Es Skëköl tò s'chkà tulu'wā. ²⁵ Ie' tò iwé es as s'chkà kè ñi blabatsò e' skéie ñi kkö'nurak buaè ñikkèè. ²⁶ Se' yese alè dalène s'mik, e' ta' s'chkà kòs e' tò ittsé. Ñies se' yese alè peñarke buaè, e' ta' s'chkà kòs e' ttsè'ne buaè.

²⁷ A' kòs eköl eköl tso' batsulewā Cristo mik wēs wák eköl è es. ²⁸ Se' dör Skëképa Jesús icha e'pa shū Skëköl tò se' tké'ka kanè kuā'kī kuā'kī uk. Kewe ie' tò Jesús ttekölpa tsá, e'pa tké'ka. E' ukuökī ta' ittekölpa malepa tkëneka. E' ukuökī ta' s'wöbla'ukwakpa ittè wa esepa tkëneka. E' ukuökī ta' ì kè or yi a ese ukwakpa tkëneka, ñies s'duöke ese bua'ukwakpa ena s'kimukwakpa ena s'wëttsukwakpa esepa tkëneka. Ñies wépa ttöke ttò kuā'kī kuā'kī wa, esepa tkëneka. ²⁹ Se' ulitane kè dör Jesús ttekölpa tsá. Se' ulitane kè dör Skëköl ttekölpa. Se' ulitane kè dör s'wöbla'ukwakpa. Se' ulitane kè dör ì kè or yi a ese ukwakpa. ³⁰ Se' ulitane kè dör s'duöke ese bua'ukwakpa. Se' ulitane kè ttöpa ttò kuā'kī kuā'kī wa. Ì chekerakitö ttò kuā'kī kuā'kī wa, ese wà kè pakanukne se' ulitane a. ³¹ Erë ì merke se' a Wiköl Bats'e'r wa, e' bua'ie yulò a' dör poè.

Se' ñi dalëritsò e' dör ñalā bua'ie

Erë ñalā bua'ie shütè, e' kkachekeyö a' a' ì ta.

13 ¹ S'ttò kuā'kī kuā'kī dò Skëköl biyöchökwakpa ttò e' kòs mú yër ye' a, erë s'malepa kè dalër ye' éna, e' ta' ye' dör wēs tabechka ppésö ese blar es ö wēs panakkuö ppésö ese blar es kè wà ta'. ² Ye' mú ttò Skëköl ttekölíe, ñies ie' siwé bléule e' kòs mú ar ye' éna ñies íyi kòs mú jcher ye' wā ñies ye' mú erblò Skëköl mik taijè dò kabata skéu ekkè, erë s'malepa kè dalër ye' éna, e' ta' ye' kè dör ì. ³ Ì kòs tso' ye' wā e' mú mëttsayö s'siarëpa a, ñies ye' wák mú e' müttsa we'ikè siarè Skëköl ttè kueki e' tsoka^k, erë s'malepa kè dalër ye' éna, e' ta' e' kè dör iie bua' ye' a.

⁴ Se' ñi dalëritsöke, e' ta' ì kòs dalè'ttsekesö bèrè, ñies se' er buaè chöke s'malepa a. Se' ñi dalëritsöke, e' ta' kè se' ukyërta' ñi kī, kè se' e' ttsötā'ka

^k 13.3 ye' wák mú e' müttsa we'ikè siarè: Yëkkuö këchke wele tò ichè: ye' mú e' müttsa ña'wéwa

s'malepa kɪ, kè se' e' bikeitsöta'ka tò se' dör pè' tajè. ⁵Se' ñi dalèritsöke, e' ta kè s'malepa suèsö er sulu wa, kè se' er muta'wa se' wák è kɪ, kè se' ulurta'ka bet, i sulu wamblërke se' ta, e' ta ese nuí olo'yekesö. ⁶Se' ñi dalèritsöke, e' ta i sulu wamblërke ese kè tò se' ttsè'wepa buaè. E' skéie mik s'malepa serke wes ttè mokɪ tò ichè es, e' ta ese je' tò se' ttsè'weke buaè. ⁷Se' ñi dalèritsöke, e' ta i kòs dalè'ttsekèsö, se' erblò michoè Skèköl mik, i buaè ye' Skèköl tò se' a ese kòs wà panekesö kröröè, i kòs wöklö'wekesö.

⁸Se' ñi dalèritsöke e' kè erta'wa. I'ñie ta imerke ttoie Skèköl ttekölie, erè aishkuö ta e' kè merpaia es. I'ñie ta imerke ttoie ttò kuà'kɪ kuà'kɪ wa, erè aishkuö ta e' kè ku'ia. I'ñie ta imerke íyi blèule ese jchenoie Wiköl Batse'r wa, erè aishkuö ta e' erdawa. ⁹E' wà dör tò i mène se' a jchenoie i'ñie ta ese kè dör Skèköl íyi wa'ñie, e' dör ikakla è. Ñies i chekesö Skèköl ttekölie, ese kè dör seraa. ¹⁰Ese kòs erdawa mik i dör ibua'ie e' de seraa eta.

¹¹E' dör i' es: Mik ye' ià alala, eta ye' ttòke wes alala es, ye' erbiköke wes alala es, íyi suekeyö wes alala es. Erè mik ye' kibineone, eta ye' kè dör alala, e' kuèkɪ ye' kè seria wes alala es. ¹²I'ñie ta se' wa Skèköl jcher wes íyi olo suèsö wösuö nula wa es. Erè aishkuö ta isuerasö ñi wöshäè. I'ñie ta ie' kak jcher ye' wa, erè aishkuö ta ijcherdawa ye' wa buaè wes ie' wa ye' jcher buaè es.

¹³I'ñie ta se' erblöke Skèköl mik. Ñies i ye'atbakitö, ese wà panekesö kröröè. Ñies se' ñi dalèritsöke. Íyi mañat ekkè wawekesö i'ñie ta, erè ibua'ie dör se' ñi dalèritsö.

Imène ttoie ttò kuà'kɪ kuà'kɪ wa, e' pakè

14 ¹A' e' chó ñi dalèritsök buaè. Ñies i merke se' a Wiköl Batse'r wa ñi kimoie ese yulö poè. Erè ttök Skèköl ttekölie e' yulö bua'ie imalepa tsata. ²E' wà dör tò yi a imène ttoie ttò kuà'kɪ wa ese kè ttökü' imalepa ta, ittöke Skèköl è ta. Kè yi skà éna ittöke e' anuk. Erè ttè blèulewa ese chekeitö Skèköl Wiköl wa. ³Erè yi a imène ttoie Skèköl ttekölie, ese ttöke imalepa ta ie'pa er diché kɪ ioie, ie'pa pattoie ena ie'pa er pabloie. ⁴Yi ttöke ttò kuà'kɪ wa Wiköl Batse'r wa, ese tò iwák è er diché kɪ ieke. Erè yi ttöke Skèköl ttekölie, ese tò Skèképa Jesús icha malepa er diché kɪ ieke. ⁵Ye' kɪ ikiane tò a' ulitane mú a imer ttoie ttò kuà'kɪ kuà'kɪ wa. Erè a' mú ttò Skèköl ttekölpaie, e' dör ibua'ie ttök ttò kuà'kɪ kuà'kɪ wa ese tsata. Erè a' ttöke ttò kuà'kɪ kuà'kɪ wa ta yile tò iwa pakène imalepa a as ie'pa er diché kɪ ièr, e' ta e' dör buaè wes yi ttöke Skèköl ttekölie ese es.

⁶A yamipa, e' wà pakekeyö a' a i' es. Ichösö tò ye' de, e' ttöke a' ta ttò kuà'kɪ wa, e' ta é' tò a' kimèmi? Au, e' kè dör iie bua'. Erè ilè kkayène ye' a ese chényö a' a ö ilè jcher ye' wa ese pakényö ö ilè chéyö Skèköl ttekölie ö a' wöbla'wéyö ttè wésele wa ese kòs chéyö a' wákpa ttò wa,

e' tã e' je' tã a' kimëmi buaë. 7E' dör wes ma'ma tso' blarta' pulë sù ö ma'ma kicha tã' sù ese blar es. Kè iblane wes ikawõtã bla'wë es, e' tã ÷i se' a' ichök tã ÷i bla'wekerakitö? 8Ñies duk bla'weke ñippökwa'ka kioie ñippök ibolökpa tã, e' kè blane wes ibla'weke es, e' tã ñippökwa'ka kè bitúpa ñippök. 9E' sù a' tã itköke. A' ttöke ttö kua'ki kua'ki wa, e' tã ÷wes e' wã armi yi éna? A' ttöke é, wes yi ttö ekörla ese es. 10S'ttö daktlilë, e' tso' tajë ká i' a, ese kôs wã ane iwákpa éna. 11Erë wele ttöke iwákpa ttö wa, kè wã ane ye' éna, e' ttséyö, e' tã ie' dör ká kua'ki wak ye' a, ñies ye' dör ká kua'ki wak ie' a. 12Ï meke Skëköl tã se' a' iWiköl wa, ese kôs yuleke a' tã poë. E' kueki yö ichè a' a, e' wëse tã se' malepa dör Skëképa icha e'pa er diché kí ieke, ese kôs yuló bua'iewa.

13E' kueki yi ttöke ttö kua'ki wa ese wák tã ikió Skëköl a' as imùitö ie' a' iwã pakone imalepa a. 14Ichösö tã ye' tso' ttök Skëköl tã ttö kua'ki wa, e' tã mokí ye' tso' ttök ie' tã, erë iwã kè ane ye' wák éna. 15¿Wes ye' iwëmi? Ye' iweke i' es: ye' ttöke Skëköl tã ttö kua'ki wa, ñies ye' ttöke ie' tã ttö ane ye' éna ese wa. E' sù ye' ttsöke ie' kíkokaie ttö kua'ki wa, erë ñies ye' ttsöke ttö ane ye' éna ese wa. 16Ichösö tã a' wele tso' wëstela chök Skëköl a' ttö kua'ki wa a' malepa kukua, erë iwã kè ane a' éna, e' tã ÷wes a' ichëmi, “Es e' idir?” 17Mokí ie' tã wëstela ché buaë Skëköl a, erë e' kè wã a' er diché kí iëne. 18Ye' ttöke ttö kua'ki wa tajë a' tsatã, e' kí ye' tã wëstela cheke Skëköl a. 19Erë mik se' ñi dapa'uke, etã ee ye' a' tã ye' kapaköke ttè böt mañat wã ane se' éna ese wa, e' dör buaë ye' kapaköke ttè tajë ttö kua'ki wa dökã 10.000 kè ane ye' éna e' skéie.

20A yamipa, kè a' kabikeitsökia wes ala'rla es. A' kabikeitsó wes s'kibinetke es. Erë buaë idir tã sene sulu yöki a' kabikeitsö wes ala'rla es. 21Skëköl tã ichè iyëkkuö kí i' es: “Eré ye' ttöraë ká i' wakpa tã s'ttö kua'ki kua'ki wa ena ká kua'ki kua'ki wakpa wa, erë ie'pa kè tã ye' ttö iutepa.” 22E' wa isuésö tã s'ttöke ttö kua'ki wa e' dör ilè kkachoie wépa kè erblötã' Jesús mik esepa a, kè idör se' erblö Jesús mik esepa a. Erë se' ttöke Skëköl ttekölíe e' je' dör se' erblö ie' mik esepa a. 23E' wã dör i' es: A' ñi dapa'uke e' kôs tso' ttök ttö kua'ki kua'ki kè ane ye' éna ese wa, e' wöshã pè' kè yöne Jesús ttè wa kè erblötã' ie' mik, esepa dewã a' shua, e' tã ie'pa tã ibikeitseraë tã a' dör alíie. 24Erë e' skéie a' ulitane ttöke Skëköl ttekölíe wã ane sulitane éna tã pè' kè erblötã' Jesús mik kè yöne ie' ttè wa esepa dewã, e' tã ie'pa éna iardaë tã nuì tso' ie'pa kí tã ie'pa e' shulöraë. 25Ï tso' blëule ie'pa er a, ese yënekã sulitane kukua tã ie'pa e' tkóralur kuchë kí Skëköl dalöioie tã icheraërakitö, “Mokí Skëköl tso' a' tã.”

A' ñi dapa'ú bèrë kè chiliwarka

26A yamipa, ttè ikkë kôs bata dör i' es: Mik a' ñi dapa'uke, etã a' ulitane wã ilè bitúmi eköl eköl s'malepa er diché ioie. A' wele wã Salmo bitúmi ttsoie. A' wele skã wã ttè tso' s'wöbla'woie. A' wele skã wã ttè

kkaché Skéköl tó ese tso' ché. A' wele wá ilè skà tso' ché ttò kuá'kí wa. A' wele wá ì yéne ttò kuá'kí wa, e' wà pakè tso'ne. E' kòs ú ñì er diché ioie. 27A' wépa ttòke ttò kuá'kí kuá'kí wa, e' tã buaé idir tó bôl è ttò, isalema mañal, erè e' dör wè'. Nies esepa kawötã ttök eköl eköl. Nies ì chekerakitó e' wà pakökne yile kawötã. 28Erè kè yi ku' iwà pakökne, e' tã ie'pa kawötã siwa'blökwa. As ie'pa ttò Skéköl tã ttò kuá'kí wa bänet ekörla. 29Es ñies wépa a imène ttoie Skéköl ttekölie, esepa ttó bôl ö mañal, e' ukuökí tã a' malepa tó iwà bikeitsó isuöie tó moki idir ö au. 30Erè a' wele ttòke Skéköl ttekölie, e' dalewa a' wele skà tkër ee, ese a' Skéköl tó ittè é ñies, e' tã wé tso' ttök ese siwa'bló as ièköl tó icha chò. 31Es a' ulitane ttómi Skéköl ttekölie eköl eköl as a' ulitane wöblar ena a' ulitane a' diché kí ièr. 32-33Skéköl dör sene bèrè mukwak e' kè chilirtã'ka. E' kuekí ie' kí ikiane tó se' ñì dapa'ù bèrè, kè chilirtã'ka wes s'batse'rpá erule erule ñì dapa'uke ká wa'ñe es. E' kuekí wépa a imène ttoie Skéköl ttekölpaie, esepa a' e' wöklörmi as ittò eköl eköl.

34Mik a' ñì dapa'uke, etã alakölpa kòs ké siwa'blökwa. Ie'pa kè kàne ttök, e' skéie ie'pa ké ittök bèrè wes Skéköl ttè dalöièno tó ichè es. 35Ie'pa ttòke mik a' ñì dapa'uke, e' dalewa e' dör jaè. E' kuekí ie'pa éna ilè chakak, e' tã as ichakörakitó iwëm a' iu a'.

36¿Ima e' ibikeitsé? ¿Skéköl ttè de a' batamik? ¿A' è ulà a' ide? Au. iA' e' kíté! 37Yi e' bikeitsó tó ie' dör Skéköl tteköl ö Wiköl Batse'r tó ie' ké ichök, e' tã ese kawötã ichök tó ì shteke ye' tó a' a' e' dör ì uk se' patkè' Skéképa Jesús tó e'. 38Erè yi tó ttè i' watéttsã, ese watèrdattsa.

39A yamipa, es ye' tó a' a' ichè tó ttök Skéköl ttekölie, e' yuló poè. Nies wépa ttòke ttò kuá'kí wa, esepa kè wöklö'war. 40Erè íyi kòs ese ú a' tó buaé yèsyèsè, kè chiliwarkã.

Cristo shkënekane, e' pakè

15 1A yamipa, Jesús tté buaé paka' ye' tó a' a, e' skà pakekeneyö a' a' i' tã as e' ska' a' er döne. Ttè ñe' klöo'bak a' tó, e' a' a' tso' tkëulewã darèrèè. 2A' e' tkéwã michoè ttè buaé ñe' a' yèsyèsè wes ye' tó a' a' iwà paka' es, e' tã e' wa' tsatkène. Kè idör es, e' tã è ichók a' erblé imik.

3Ttè meneat ye' a, e' è paka'neyö a' a. E' bua'ie dör i' es: Cristo kótewã se' nuì kí wes itso' kitule Skéköl yèkkuó kí es. 4Ñies ie' wötènewã pö a, e' kí ká de mañat, etã ishkenekane wes itso' kitule Skéköl yèkkuó kí es. 5Ñies ie' kkaché Cefas a. E' ukuökí tã ie' kkaché ittekölpa tsá dabom eyök kí bôl (12), e'pa a. 6E' ukuökí tã ie' kkaché s'yamipa dökã cien skeyök (500) kíta, e'pa a' mik iñi dapa'wé ek tsiní ème etã. Ie'pa ekképa welepa blèrulunetke, erè ikibiiepa dobyërkeia. 7E' ukuökí tã ie' e' kkaché Santiago a. E' ukuökí tã ie' e' kkaché ittekölpa kòs a.

8Bata ekké tã ie' e' kkaché ye' a. Ye' dör ittekölpa tsá e'pa yulé, erè ñies ie' e' kkaché ye' a. 9Skéköl icha, e'pa we'ikök ye' bak. E' kuekí ye' dör

ittekölpa malepa dikia diöshet. Ye' kiök ie'pa eköl, e' kè dör ye' siarla e' a. ¹⁰Erë Skëköl er buaë ché ye' a, e' kuekì ye' dör ie'pa eköl. Ie' er buaë ché ye' a e' kè dör éme. E' wakanewéyö taië ie'pa malepa tsata. Ñermata kè dör tö ye' wák tö iwakanewé. Iwakanewéyö Skëköl er buaë chò ye' a e' batamik. ¹¹Erë Jesús tté buaë, e' dör etkème, e' paka' sa' tò a' a, e' mik a' erblé. Ye' tö ipakè ö ie'pa tö ipakè, e' kè dè' wes.

Se' duulewá shkerdakane

¹²Sa' tö ipakeke tö Cristo kötewa, e' shkenekane. Erë a' welepa tö icheke tö s'duulewá kè shkertakane. ¿Wes e' chëmi ie'pa tö? ¹³S'duulewá kè shkertakane, e' ma Cristo kè shkenekane. ¹⁴Ie' kè shkenupakane, e' ma é ye' tö ie' tté buaë pakeke. Ñies é a' erblöke ie' mik. ¹⁵Sa' tö ipakeke tö Skëköl tö ie' shkeo'kane, erë s'duulewá kè shkertakane, e' ma ie' kè shkenekane. E' mú dör es, e' ma tté pakeke sa' tö Skëköl ttò wa e' dör kache. ¹⁶S'duulewá kè shkertakane, e' ma Cristo kè shkenekane. ¹⁷Ie' kè shkenupakane, e' ma é a' erblöke ie' mik. Se' tso'ia se' nuì ulà a. ¹⁸Ñies e' mú dör es, e' ma wépa erblé' ie' mik blërulune, esepa tso'tke weinuk. ¹⁹Se' tö Cristo paneke, e' kè wà tkópa aishkuö ta, e' ma se' dör siarè chökle s'malepa dikia.

²⁰Erë mokì Cristo shkenekane! Ie' dör se' shkerkane e'pa tsá, e' kuekì se' wa ijcher tö ñies se' shkerdakane. ²¹E' wà dör i' es: Wëm eköl wa s'duòwá e' ali'ka sulitane kì. E' sù wëm skà eköl wa s'duulewá shkerdakane. ²²Sulitane dè'ka Adán wa, e' kuekì sulitane wömenettsa duökwá wes ie' es. Erë se' batsulewá Cristo mik e'pa kos shkerdakane wes ie' shkenekane es. ²³Erë e' kos mir wes ikawõtá minuk es. Cristo shkenekane kewe. E' itökì mik idene, etá se' dör ie' icha, e'pa kos shkerdakane. ²⁴Etá ká i' erdawa. E' kéwö ska' ta Cristo e' alöraká íyi wökir, íyi wák, íyi kéköl wá diché ta' ese kos kì. Ì kos blu'ie ie' tso' e' merattsaitö Skëköl dör S'yé e' ulà a. ²⁵Erë i'ñe ta' ie' tso'ia íyi kos wëttsuk blu'ie dò mik ibolökpa kos menewá ie' klò dikia etá. ²⁶Ie' bolök bata, e' dör s'duòwá, e' kì ie' e' alöraká bataie. ²⁷E' dör wes itso' kitule Skëköl yëkkuö kì es, e' tò ichè: “Íyi ulitane menewá ie' klò dikia.” Erë se' éna iane tö mik iyëne “íyi ulitane” etá Skëköl kè ku' e' shua, ie' wák tö ì kos mérö Cristo klò dikia e' kuekì. ²⁸Erë mik íyi ulitane mérötke Skëköl tö Cristo dör ilà e' klò dikia, etá ñies Cristo e' murattsá iyé ulà a as íyi ulitane dò ie' dikia.

²⁹S'duulewá kè shkertakane, e' ma wépa wösune s'duulewá skéie' ¿iök e' wekerakitö? S'duulewá kè shkertakane, e' ma ¿iök ie'pa wösune esepa skéie? ³⁰S'duulewá kè shkertakane, e' ma ¿iök se' e' mùmi weinuk

¹ 15.29 s'wösune s'duulewá skéie: E' dör ì uk ie'pa welepa wöblar es. Kè iyëne Skëköl wá tò iü es.

kekraë ttè e' pakök? ³¹A yamipa, ká bit tã ye' kî idalò me'rie ttsëskua ye' ttëmiwã yile tó. E' dör moki wës a' tso' batsulewã Skëkëpa Cristo Jesús mik, e' tó ye' ttsë'weke buaë e' dör moki es. ³²Íe Éfeso ye' bolökpa tso' ñippök ye' tã wës iyiwak sulusi es. Kè se' shkertã'kane, e'ma ñiök e' dalë'ttsekeyö? E' kè dör ñie bua' ye' a. Moki tó s'duulewã kè shkertã'kane, e'ma iüsö wës welepa tó icheke es. E' dör i' es: “Bulepa s'duöralur, e' kueki i'ñe se' chkò, se' di'yò buaë kaneë.”

³³Kè a' e' muktsã e' kitò'uk es. E' dör wës yile tó iyè' es, e' dör i' es. “S'yamipa e' wamblò sulu esepa tó s'ser yësyësë esepa sulu'wekewa.”

³⁴A' erbikóne buaë yësyësë. Ì sulu kè wamblaria a' tó. A' welepa kè bàtse Skëköl mik yës. E' chéyö a' a jaëwoka.

Se' duulewã shkërdakane ñis e' chkà dör?

³⁵Isalema a' welepa tó ichakëmi: “Se' duowa, ¿wës e' shkërmikane? ¿Ìs e' chkà dör?” ³⁶Ì chaké a' tó wës kè s'kabikeitsò ese ñ chakè es! Iyiwö tkësö, e' kè dë'kane, ikuala deka tã iwö dalola nunéwã. ³⁷Mik se' tó trigo wö tkéwã, etã kè se' wã itkëne kuáie. Se' tó iwö dalola tké. ³⁸E' ukuökî tã ikua deka wës Skëköl ime'atbak es. E' sù iyiwö ulitane dörakã iwakmik iwakmik wës imeneat es.

³⁹S'ditsö ena iyiwak klòka ena dù ena nima e' wák dör kuã'kî kuã'kî ñies ichkà dör kuã'kî kuã'kî. ⁴⁰Ñies ñ meneat ká jaì a ena ñ meneat ká i' a e' dör kuã'kî kuã'kî. E' kos dör buaala, erë iwër kuã'kî kuã'kî. ⁴¹Diwö si'wö bëkwö e' kos dalöburke kuã'kî kuã'kî. Ñies bëkwö kos e' wák dalöburke ek ek kuã'kî kuã'kî.

⁴²Mik se' shkënekane, etã se' manenettsatke wës iyiwö tkëne e' manerttsã es. Se' chkà i' nurtã'wã, erë mik ishkenekane, etã kè inurpawã. ⁴³S'chkà i' dör ësela, erë ishkerdakane olo tã' tajë. S'chkà i' kè diché tã', erë ishkerdakane diché tã' tajë. ⁴⁴S'chkà i' dör buaë sènoie i'ñe tã, erë mik ishkenekane, etã imanenettsã sènoie buaë aishkuö tã Wiköl Batse'r tã. ⁴⁵E' dör wës Skëköl yëkkuö tó ichè es, e' tó ichè: “Wëm tsá kiè Adán, e' yöne se'ie ttsé'ka.”^m Erë wëm skà de eköl Adán es, e' dör Cristo, e' yöne sene michoë mukwak. ⁴⁶Erë s'chkà sènoie aishkuö tã, e' kè mène Skëköl wã se' a kewe. S'chkà i' me'itö se' a kewe. E' itökî chkà sènoie aishkuö tã Wiköl Batse'r tã ese merdaë se' a. ⁴⁷Wëm tsá yöne íyök wa, e' kueki e' dör ká i' wak. Erë wëm skà de Adán es, e' datse ká jaì a. ⁴⁸Wépa dör ká i' wakpa, esepa dör wës wëm tsá yöne íyök wa ñe' es. Erë wépa dör Skëköl tso' ká jaì a e' icha esepa dör wës wëm datse eë es. ⁴⁹Se' tó wëm datse ká jaì a e' kítseraë wës wëm yöne íyök wa ñe' kítse'sö es.

⁵⁰A yamipa, ye' tó a' a ichè tó se' chkà i' duötã'wã nurtã'wã e' kè döpawã ñ blúie Skëköl tso' e' a. ⁵¹⁻⁵²Ye' ttò ttsó. Ttè bak bléulewã ese

^m 15.45 Génesis 2.7

chekeyö a' a i' tã: Kè se' ulitane duòpawã erè mik Skèköl duk blane iwà kkachöie tò kawö i' enewatke etã se' kôs maneordattsa bet wës s'wöbla tsimiü es. Mik duk ñe' blane, etã s'duulewã kôs shkerdaka, kè duòpawãia. Ñies se' tso'ia ttsè'ka, e' chkà maneordattsa. ⁵³Se' chkà i' nurta'wã, e' maneordattsa chkà kè nurta'wã ese wa. Se' chkà i' duòta'wã, e' maneordattsa chkà kè duòta'wã, ese wa. ⁵⁴Mik se' chkà i' manenettsa kè duòpawãia, kè nурpawãia, etã ì tso' kitule Skèköl yèkkuö kï, e' wà de, e' tò ichè: “Duewã kï Skèköl e' aléka.” ⁵⁵A Duewã, ¿wé be' diché taië e'? ¿Wé be' e' alò taië e'? Be' kirèbata tso' se' rrewoie taië, ¿wé e' i' ta?™” ⁵⁶Se' ser sulu kuekï duèwã tò se' rreweke ena sene sulu diché iène ttè dalöièno wa. ⁵⁷Erè se' nuì olo'yane se' kï Skèképa Jesucristo batamik, e' kuekï kè se' suaneia s'duòwã yökï. E' kuekï kekraë wèstela chekesö Skèköl a.

⁵⁸E' kuekï, a yamipa dalër ye' éna, a' e' tkówã darèrè kekraë Skèképa ttè a, kè a' e' sköktsã bánet. A' wã ijcher tò ì kôs kanewé a' tò ie' a, e' kè weirpa éme. E' kuekï a' kï kanabló buaë kekraë ie' a.

Inuköl shteke s'siarèpa kimoie, e' pakè

16 ¹Inuköl shteke a' tò s'batse'rpa serke Jerusalén e'pa kimoie, e' pakeke ye' tò a' a i' tã. Inuköl shtó wës ye' tò iyè' Skèképa icha erule erule tso' Galacia, e'pa a es. ²Domingo bit tã a' wakpa bik ekkè tò a' inuköl shta'ú tò kôs a' ulà a ide. Etã kôs a' a imermi, e' bló bánet. A' tò iwé es, etã mik ye' de a' ska', etã kè a' kawõtã inuköl shtök, a' wã itso'tke blèule e' kuekï. ³Mik ye' de a' ska', etã wépa shushtétke a' tò patkèmi Jerusalén inuköl ñe' muk, e'pa tté choie yèkkuö shtekemiyö e' mi'ke ie'pa wã. Es ye' tò ie'pa patkeke Jerusalén. ⁴A' ibikeitsé tò buaë idir tò ye' mi'ñak ie'pa tã, e' tã ye' mi'mi.

Pablo tò ishkak e' aleritsé

⁵Ye' kawõtã minuk Macedonia, e' ukuökï tã ye' mi'ke a' ska'. ⁶Isalema ye' e' tsukeat a' ska' si' et si' böt ulatök ö isalema ye' e' tsümiat dò yuèdiö tka ekkè. Es a' a ye' kimermi ì kiane ye' kï shkoie ese wa as ye' mi' buaë wé ye' mi'mirö eë. ⁷Ye' kè shkak a' pakök shkaule. Ye' mú ser a' ska' kã taië, Skèképa kï ikiane e'ma. ⁸Erè ye' e' tsukeat íe Éfeso dò Pentecostés kéwö tka ekkè. ⁹Íe buaë ye' a' kawö kune Jesús tté buaë pakoie. Ye' bolökpa tso' taië, erè ñies taië pé' éna Jesús tté buaë ttsak. E' kuekï kè ye' e' yaktsã i' tã íe.

¹⁰Timoteo kanablöke Skèképa a wës ye' es, e' kuekï ie' de a' ska', e' tã ikiówã buaë. ¹¹Kè yi kàne ie' dalöseukwã. E' skéie ie' kímú as ie' döne bèrè ye' ska'. Ye' tso', ie' ena s'yamipa urke ie' tã, e'pa panuk.

™ 15.54 Isaías 25.8 ° 15.55 Oseas 13.14

¹²Ye' tò s'yami Apolo e' cheke a' a' i' tã. Ye' kköyè' ie' a' tajë tò ie' yúñak s'yamipa mi'ke a' pakök e'pa tã. Ie' kè shkak i' tã, erè wekkè alè tã ie' a' kawö kurmi, etã ie' mi'mi.

Pablo tò ie'pa bata patté

¹³A' senú erki. A' e' tkówa darèrè a' erblöke Jesús mik e' a. A' e' tkówa wëbla suè, kè a' suanuk. A' erbló darèrè ie' mik. ¹⁴Ì weke a' tò kos ese ú ñi dalèritsè wa.

¹⁵A yamipa, a' wa ijcher tò Estéfanos ena iyamipa e'pa dör Acaya wakpa tsá erblé' Jesús mik e'pa. Ie'pa e' ché buaè s'batse'r malepa kimuk. ¹⁶Ye' tò a' a' ikiè tajë tò ie'pa esepa ttò dalöió er bua' wa. Ñies yi isie tso'ñak kaneblök Skëképa kanè a' esepa ttò dalöió.

¹⁷Ye' ttsé'ne buaè tò Estéfanos ena Fortunato ena Acaico e'pa de ye' ska'. Ie'pa tso' ye' kimuk tajë a' kè ku' e' skéie. ¹⁸Ie'pa tò ye' er pablé wës a' er pablérakitò es. Buaè idir ie'pa esepa kïkökka.

Pablo e' chéat

¹⁹Skëképa Jesús icha erule erule kos tso' Asia, e'pa tò a' shké'wémi. Áquila ena Prisca ena Skëképa icha ñi dapa'uke ie'pa u a, e'pa tò shkéne patké tajë a' a' Skëképa ttò wa. ²⁰S'yamipa kos tso' íe, e'pa tò a' shké'wémi. A' ñi shké'ú ñi dalër wa.

²¹Ye' dör Pablo e' tò shkéne i' shté ye' wák ulà wa.

²²Yi kè éna Skëképa dalër, e' tã as ese kichatër. iA Skëképa, be' shkóne bet!

²³As Skëképa Jesús er buaè chò a' a.

²⁴Ye' éna a' dalër Cristo Jesús batamik. Es e' idir.